



TÍTULO II. MEDIDAS ADMINISTRATIVAS

III. TÍTULO II. MEDIDAS ADMINISTRATIVAS

CAPÍTULO I *Función Pública*

Artigo 5.- *Concurso*

Modifícase a alínea 2 do artigo 89 Lei 2/2015, do 29 de abril, de Emprego Público de Galicia, que queda redactado como segue:

“2. Os concursos para a provisión de postos de traballo poden convocarse para a xeneralidade dos postos de traballo vacantes, para postos de traballo dun determinado ámbito ou para postos de traballo concretos, en atención ás necesidades do servizo. En todo caso, non se incluírán neles os postos de traballo que teñan adscrito persoal funcionario de carreira por motivos de saúde ou rehabilitación ou por motivos de violencia de xénero.

Non obstante, o persoal funcionario de carreira que estea adscrito por motivos de saúde ou rehabilitación a un posto de traballo en distinta localidade á que teña o seu destino definitivo, estará obrigado a participar nos concursos de provisión, para postos adecuados ao seu corpo ou escala, que se convoquen e solicitar todos os postos situados na mesma localidade do posto ao que figure adscrito provisionalmente.

O incumprimento desta obriga determinará o cesamento no posto no que figure adscrito por motivos de saúde ou rehabilitación.”

Artigo 6.- *Comisión de servizos voluntaria*

Modifícase a alínea 2 do artigo 96 Lei 2/2015, do 29 de abril, de Emprego Público de Galicia, que queda redactado como segue:

“2. En todo caso, para o desempeño dun posto de traballo en comisión de servizos voluntaria, o persoal funcionario deberá pertencer ao corpo ou escala e reunir os demais requisitos que estableza a correspondente relación de postos de traballo.

Non obstante, para a consecución da eficacia na prestación dos servizos e a eficiencia dos recursos humanos dispoñibles, o persoal funcionario de carreira das escalas de administración xeral ou especial, poderá ocupar con carácter temporal, mediante comisión de servizos voluntaria, postos de traballo dunha escala diferente á que pertenza, sempre que a titulación de acceso na súa escala orixinaria sexa a mesma que a requirida para o posto de traballo de que se trate. En todo caso, outorgarase prioridade ao persoal funcionario de carreira que pertenza á mesma escala do posto que sexa obxecto de cobertura.”

Artigo 7.- *Mobilidade interadministrativa*

Engádese unha nova alínea 4 bis ao artigo 104 da Lei 2/2015, do 29 de abril, de Emprego Público de Galicia, co seguinte contido:

“4bis. O persoal funcionario de carreira, pertencente á escala de Administración Local con habilitación de carácter nacional do subgrupo A1, que como consecuencia das medidas de fomento para as fusións de municipios ou para incorporación voluntaria a outros, opte por ser transferido á Comunidade Autónoma de Galicia, integrárase plenamente na organización da función pública autonómica, no corpo superior da Administración xeral da Comunidade Autónoma de Galicia. No caso de que ao ser transferido, se suprimise o posto de traballo que viña ocupando, seralle de aplicación o disposto no artigo 97 desta Lei.”

Artigo 8.- *Definicións*

Modifícase a letra c) da disposición adicional primeira da Lei 2/2015, do 29 de abril, de Emprego Público de Galicia, que queda redactada como segue:

“c) Localidade: o correspondente termo municipal de residencia do persoal funcionario. Exceptúase o caso do persoal estatutario, para o cal esta expresión enténdese que fai referencia á correspondente área de saúde, agás no caso dos permisos por falecemento, accidente ou enfermidade graves, hospitalización ou intervención cirúrxica dun familiar, no cal se aplicará o réxime xeral previsto no primeiro inciso desta alínea.”

Artigo 9.- *Escalas e especialidades dos corpos de Administración xeral da Comunidade Autónoma de Galicia*

Un. Modifícase na alínea I da disposición adicional oitava da Lei 2/2015, do 29 de abril, de Emprego Público de Galicia, a escala superior de seguridade e saúde no traballo, que queda redactada como segue:

DENOMINACIÓN	ESPECIALIDADES	SUBGRUPO	FUNCIÓNS	TITULACIÓN
Escala superior de seguridade e saúde no traballo	Seguridade no traballo	A1	Exercicio dos labores técnicos en materia de prevención de riscos laborais, de acordo co disposto na lexislación de prevención de riscos laborais e, en particular, nos artigos 7.1 e 9.2 da Lei 31/1995, do 8 de novembro, de prevención de riscos laborais, ou na norma que a substitúa, nas áreas, respectivamente, de seguridade no traballo, hixiene industrial e ergonomía e psicosocioloxía aplicada, sen prexuízo das funcións que, en materia mineira, exerza o persoal funcionario con competencias en materia de prevención de riscos laborais da consellaría competente nesta área.	Arquitecto, graduado ou máster que habilite para o exercicio da profesión de arquitecto, enxeñeiro ou máster nunha titulación que habilite para o exercicio da profesión de enxeñeiro, e título de técnico con formación en nivel superior, nas tres disciplinas preventivas, consonte establece o Regulamento dos servizos de prevención, aprobado polo Real decreto 39/1997, do 17 de xaneiro, ou pola norma que o substitúa
	Hixiene industrial			Licenciado ou graduado en Bioloxía, licenciado ou graduado en Química ou licenciado en Farmacia ou graduado nunha titulación que habilite para a profesión de farmacéutico, e título de técnico con formación en nivel superior, nas tres disciplinas preventivas, consonte establece o Regulamento dos servizos de prevención, aprobado polo Real decreto 39/1997, do 17 de xaneiro, ou pola norma que o substitúa.
	Ergonomía e psicosocioloxía aplicada			Licenciado ou graduado nunha titulación de calquera rama e título de técnico con formación en nivel superior, nas tres disciplinas preventivas, consonte establece o Regulamento dos servizos de prevención, aprobado polo Real decreto 39/1997, do 17 de xaneiro, ou pola norma que o substitúa.

Dous.- Modifícase na alínea 3 da disposición adicional oitava da Lei 2/2015, do 29 de abril, de Emprego Público de Galicia, a escala de axentes de inspección, que queda redactado como segue:

DENOMINACIÓN	ESPECIALIDADES	SUBGRUPO	FUNCÍONS	TITULACIÓN
Escala de axentes de inspección	Consumo	C1	- Apoio aos labores encomendados aos inspectores de consumo	Bacharel ou técnico
	Vixilancia de estradas		- Vixilancia do estado de conservación e explotación dos elementos que integran o dominio público viario, das obras dirixidas pola Axencia Galega de Infraestruturas e das obras ou doutros usos realizados nas zonas de protección das estradas por terceiros. - Denuncia ou informe de calquera incumprimento ou anomalía. - Vixilancia do cumprimento da normativa vixente en materia de seguridade viaria, do medio ambiente e da seguridade e prevención de riscos laborais. - Elaboración de partes de servizo, boletíns de denuncias, informes e demais documentos relacionados coas súas funcións. - Cantas outras funcións compatibles co seu nivel e coñecementos lle indique o seu superior.	
	Mobilidade		- Control e vixilancia do cumprimento da norma en materia de transporte terrestre e marítimo en augas interiores. - Realización da inspección nas instalacións de empresas que realicen actividades de transporte ou de formación en materia de transportes, en estacións de transporte ou en toda clase de vías terrestres. - Constatación de feitos que poidan ser constitutivos de infracción e formulación de actas de infracción. - Elaboración de informes nos expedientes que se lle requira. - Cualificación de feitos constitutivos de infraccións e tramitación de expedientes sancionadores. - Asesoramento aos intervinientes no sector do transporte para facilitar o cumprimento da legalidade. - Elaboración de estatísticas de inspeccións, denuncias e infraccións relacionadas coas tarefas de inspección. - Realización das tarefas administrativas que deriven das súas funcións.	

Tres.- Engádese unha alínea 3 bis na disposición adicional oitava da Lei 2/2015, do 29 de abril, de Emprego Público de Galicia, co seguinte contido:

“3bis. No corpo auxiliar existen as seguintes escalas e especialidades:

DENOMINACIÓN	ESPECIALIDADES	SUBGRUPO	FUNCIÓNS	TITULACIÓN
Escala de Persoal de Servizos Xerais (PSX)		C2	- Administrativa e de apoio á xestión. - Recepción, portaría, atención e información aos usuarios. Apertura e peche dos centros ou unidades. Funcións de mantemento e apoio as funcións xerais. - Limpeza, lavandería, mantemento e apoio ás funcións xerais. - Apoio en cociña e comedor segundo o centro e o tipo de servizo. - Calquera outra de análogo contido ou que teña relación coas funcións anteriores.	Graduado en E.S.O. ou equivalente ou Ciclo Medio de Formación Profesional

Artigo 10.- *Escalas e especialidades dos corpos de Administración especial da Comunidade Autónoma de Galicia.*

Un.- Modifícase na alínea I da disposición adicional novena da Lei 2/2015, do 29 de abril, de Emprego Público de Galicia, a escala de arquitectos, a escala de ciencias e a escala de inspección urbanística, que quedan redactadas como segue:

DENOMINACIÓN	ESPECIALIDADES	SUBGRUPO	FUNCIÓNS	TITULACIÓN
Escala de arquitectos		A1	Estudo, xestión, execución, proposta e inspección de carácter facultativo superior, de acordo coa titulación esixida e coas funcións concretas asignadas ao desempeño do correspondente posto de traballo.	Arquitecto, graduado ou máster nunha titulación que habilite para o exercicio da profesión de arquitecto
Escala de ciencias	Bioloxía	A1	Estudo, xestión, execución, proposta e inspección de carácter facultativo superior, de acordo coa titulación esixida e coas funcións concretas asignadas ao desempeño do correspondente posto de traballo	Licenciado ou graduado nunha titulación da rama de ciencias
	Química			
Escala de inspección urbanística	Ciencias do mar	A1	Estudo, xestión, tramitación e proposta de resolución dos resultados da actividade de inspección e control do cumprimento da normativa urbanística nos actos de edificación e uso do solo que se realicen na comunidade autónoma.	Arquitecto ou enxeñeiro de Camiños, Canais e Portos, graduado ou máster nunha titulación que habilite para o exercicio da profesión de arquitecto ou máster nunha titulación que habilite para o exercicio da profesión de enxeñeiro de Camiños, Canais e Portos.
	Xurídica			Licenciado en Dereito ou graduado nunha titulación equivalente da rama de ciencias sociais e xurídicas.

Dous.- Engádese na alínea 3 da disposición adicional novena da Lei 2/2015, do 29 de abril, de Emprego Público de Galicia, a escala de brigadistas, co seguinte contido:

DENOMINACIÓN	SUBGRUPO	FUNCIÓNS	TITULACIÓN
Escala de Brigadista	B	Coordinación do persoal para previr, combater e extinguir incendios de natureza forestal así como vixilancia e mantemento das labores de prevención. Coordinación en situacións de emerxencia nas áreas rurais e forestais e colaboración cos responsables dos servizos de protección civil no amparo de persoas e bens ante a incidencia dos incendios forestais. Así mesmo, deberá conducir cando o demanden as necesidades do servizo polo que debe estar en posesión do carné de conducir B.	Técnico/a superior en Xestión e Organización de Recursos Naturais e Paisaxísticos ou formación profesional de segundo ou grao equivalente

Tres.- Engádese unha alínea 4 bis na disposición adicional novena da Lei 2/2015, do 29 de abril, de Emprego Público de Galicia, co seguinte contido:

“4bis. No corpo de auxiliares de carácter técnico de Administración especial créanse as seguintes escalas e especialidades:

DENOMINACIÓN	ESPECIALIDADES	SUBGRUPO	FUNCIÓNS	TITULACIÓN
Escala de Auxiliares de clínica		C2	- Todas aquelas actividades que, sen ter un carácter profesional sanitario, veñen facilitar as funcións do Médico e da Enfermeira ou Axudante Técnico Sanitario.	Técnico/a en coidados auxiliares de enfermaría ou técnico auxiliar da rama sanitaria
Escala de Xerocultor			Asistir ao usuario/a na realización das actividades básicas e instrumentais, tanto sociais como sanitarias, da vida cotiá que non poida realizar por el mesmo, por mor da súa discapacidade e efectuar aqueles traballos encamiñados a súa atención persoal do seu contorno. En xeral, todas aquelas actividades que lle sexan encomendadas , que estean incluídas no exercicio da súa profesión e preparación técnica.	Ciclo medio de Formación Profesional na rama de Sanidade ou de Servizos Socioculturais á comunidade ou equivalente.

DENOMINACIÓN	ESPECIALIDADES	SUBGRUPO	FUNCIONES	TITULACIÓN
Escala de Bombeiro/a Forestal	Operador/a de datos	C2	Previr, combater e extinguir incendios de natureza forestal así como vixilancia e mantemento das labores de prevención. Atención en situacións de emerxencia nas áreas rurais e forestais e colaboración cos servizos de protección civil no amparo de persoas e bens ante a incidencia dos incendios forestais. Manexo dos medios materiais para o tratamento da información tendentes á execución dos sistemas operativos dos SPDCIF.	Graduado/a en E.S.O. ou equivalente
	Emisorista / Vixiante/a fixo/a		Previr, combater e extinguir incendios de natureza forestal así como vixilancia e mantemento das labores de prevención. Atención en situacións de emerxencia nas áreas rurais e forestais e colaboración cos servizos de protección civil no amparo de persoas e bens ante a incidencia dos incendios forestais. Realización das transmisións para asegurar unha adecuada comunicación dos avisos, ordes ou instrucións dentro do servizo.	
	Persoal Conductor		Previr, combater e extinguir incendios de natureza forestal así como vixilancia e mantemento das labores de prevención. Atención en situacións de emerxencia nas áreas rurais e forestais e colaboración cos servizos de protección civil no amparo de persoas e bens ante a incidencia dos incendios forestais. Labores silvícolas preventivos de diminución da combustibilidade das masas forestais e obras de construción, mellora e mantemento da infraestrutura, ademais, conducirá vehículos dedicados ao transporte das cuadrillas e materiais do servizo polo que debe estar en posesión do carné de conducir B e C.	
Escala de Oficial 2ª Mecánico/a de Máquinas de Defensa Contra Incendios Forestais		C2	Persoal que, tendo os coñecementos que correspondan de mecanización, se ocupa das reparacións e mantemento dos vehículos e maquinaria que se poidan realizar e os medios dos parques de maquinaria dos Servizos de Prevención e Defensa Contra Incendios Forestais. Así mesmo, deberá conducir vehículos, traslado de vehículos avariados, e outros cometidos de similares características polo que debe estar en posesión do carné de conducir B.	Técnico/a en Electromecánica de Vehículos ou Técnico/a auxiliar da rama equivalente

Artigo 11.- Adscrición a ramas de coñecemento das titulacións a que se refire a disposición adicional quinta para efectos do previsto nas alíneas primeira e segunda das disposicións adicionais oitava e novena

Modifícase a disposición adicional décima da Lei 2/2015, do 29 de abril, de Emprego Público de Galicia, que queda redactada como segue:

“Disposición adicional décima. Adscrición a ramas de coñecemento das titulacións a que se refire a disposición adicional quinta para efectos do previsto nas alíneas primeira e segunda das disposicións adicionais oitava e novena.

Para os efectos do previsto nas alíneas primeira e segunda das disposicións adicionais oitava e novena, as titulacións a que se refire a disposición adicional quinta quedan adscritas ás distintas ramas de coñecemento do seguinte xeito:

a) Artes e humanidades

Subgrupo A1:

- Licenciado en Documentación
- Licenciado en Antropoloxía Social e Cultural
- Licenciado en Belas Artes
- Licenciado en Filoloxía (alemá, árabe, catalá, clásica, eslava, francesa, galega, hebrea, hispánica, inglesa, italiana, portuguesa, románica, vasca)
- Licenciado en Filosofía
- Licenciado en Xeografía
- Licenciado en Historia
- Licenciado en Historia da Arte
- Licenciado en Historia e Ciencias da Música
- Licenciado en Humanidades
- Licenciado en Lingüística
- Licenciado en Teoría da Literatura e Literatura Comparada
- Licenciado en Tradución e Interpretación

Subgrupo A2:

- Diplomado en Biblioteconomía e Documentación

b) Ciencias

Subgrupo A1:

- Licenciado en Bioloxía
- Licenciado en Bioquímica
- Licenciado en Ciencias Ambientais
- Licenciado en Ciencias do Mar
- Licenciado en Ciencias e Técnicas Estatísticas
- Licenciado en Física
- Licenciado en Xeoloxía
- Licenciado en Matemáticas
- Licenciado en Química
- Licenciado en Enoloxía

Subgrupo A2:

- Diplomado en Estatística

c) Ciencias da saúde

Subgrupo A1:

- Licenciado en Ciencia e Tecnoloxía dos Alimentos
- Licenciado en Farmacia
- Licenciado en Medicina
- Licenciado en Veterinaria
- Licenciado en Odontoloxía
- Licenciado en Psicoloxía

Subgrupo A2:

- Diplomado en Enfermaría
- Diplomado en Fisioterapia
- Diplomado en Logopedia
- Diplomado en Nutrición Humana e Dietética
- Diplomado en Óptica e Optometría
- Diplomado en Podoloxía
- Diplomado en Terapia Ocupacional

d) Ciencias sociais e xurídicas

Subgrupo A1:

- Licenciado en Administración e Dirección de Empresas
- Licenciado en Ciencias Actuais e Financeiras
- Licenciado en Ciencias do Traballo
- Licenciado en Ciencias Políticas e da Administración
- Licenciado en Comunicación Audiovisual
- Licenciado en Dereito
- Licenciado en Economía
- Licenciado en Investigación e Técnicas do Mercado
- Licenciado en Pedagogía
- Licenciado en Periodismo
- Licenciado en Psicopedagogía
- Licenciado en Publicidade e Relacións Públicas
- Licenciado en Socioloxía
- Licenciado en Ciencias da Actividade Física e o Deporte

Subgrupo A2:

- Diplomado en Ciencias Empresariais

Diplomado en Educación Social
Diplomado en Xestión e Administración Pública
Diplomado en Relacións Laborais
Diplomado en Traballo Social
Diplomado en Turismo
Mestre

e) Enxeñaría e arquitectura

Subgrupo A1:

Arquitecto
Enxeñeiro aeronáutico
Enxeñeiro de Camiños, Canais e Portos
Enxeñeiro de Materiais
Enxeñeiros de Minas
Enxeñeiro de Telecomunicación
Enxeñeiro en Automática e Electrónica Industrial
Enxeñeiro en Electrónica
Enxeñeiro en Xeodesia e Cartografía
Enxeñeiro en Organización Industrial
Enxeñeiro xeólogo
Enxeñeiro industrial
Enxeñeiro naval e oceánico
Enxeñeiro en Informática
Enxeñeiro químico
Enxeñeiro agrónomo
Enxeñeiro de Montes
Licenciado en Máquinas Navais
Licenciado en Náutica e Transportes Marítimos
Licenciado en Radioelectrónica Naval

Subgrupo A2:

Arquitecto técnico
Enxeñeiro técnico agrícola
Enxeñeiro técnico forestal
Enxeñeiro técnico informático
Enxeñeiro técnico aeronáutico
Enxeñeiro técnico industrial

Enxeñeiro técnico de minas
Enxeñeiro técnico naval
Enxeñeiro técnico de telecomunicación
Enxeñeiro técnico en topografía
Enxeñeiro técnico en obras públicas
Enxeñeiro técnico en deseño industrial
Diplomado en máquinas navais
Diplomado en navegación marítima
Diplomado en radioelectrónica naval

Artigo 12.- *Persoal laboral temporal desempeñen postos de traballo de persoal funcionario*

Engadese unha disposición transitoria primeira bis da Lei 2/2015, do 29 de abril, de Emprego Público de Galicia, co seguinte contido:

“Disposición transitoria primeira bis.- Persoal laboral temporal desempeñen postos de traballo de persoal funcionario

1.- A aprobación das correspondentes relacións de postos de traballo polo Consello da Xunta de Galicia de acordo coas previsións do parágrafo 2 da disposición transitoria primeira determinará, de acordo co establecido nos artigos 26 e 38 desta lei, a transformación en postos de traballo de natureza funcionarial daqueles postos vacantes que viñesen sendo desempeñados por persoal laboral temporal.

O persoal laboral indicado poderá seguir desempeñando as súas funcións, de acordo co establecido nos apartados seguintes desta disposición.

2.- Coa finalidade de facer posible o cumprimento das normas establecidas nesta lei en canto aos postos que deben ser cubertos por persoal funcionario, os principios de organización, racionalización e ordenación do personal, así como para homoxeneizar o réxime xurídico e condicións de traballo aplicables a este, en orden a facilitar unha eficaz prestación dos servizos públicos, a administración expedirá un nomeamento de natureza funcionarial interina, no correspondente corpo ou escala de clasificación, ao persoal laboral temporal que, de acordo co establecido no apartado anterior, ocupe postos previstos como de natureza funcionarial nas relacións de postos de traballo, sempre que reúna os requisitos para a ocupación do posto e tivera sido seleccionado como laboral temporal segundo os procedementos de acceso á condición de laboral temporal establecidos pola normativa vixente.

Este nomeamento requirirá a súa aceptación polo persoal interesado e suporá a novación da relación xurídica existente coa administración, sen solución de continuidade na prestación dos servizos, e a transformación daquela nun vínculo xurídico de natu-

reza funcionarial interina, rexido pola presente lei. Cando as retribucións do persoal laboral sexan diferentes ás correspondentes ao réxime funcionarial, previa negociación coas organizacións sindicais presentes na Mesa Xeral de Empregados Públicos, e de acordo sempre co principio de estabilidade orzamentaria, por decreto do Consello da Xunta de Galicia estableceranse as condicións e os prazos da equiparación retributiva.

3.- No caso de que a relación de postos de traballo prevexa a amortización do posto, de acordo coas necesidades de organización do servizo público, nos casos nos que o persoal interesado non aceptase o nomeamento interino previsto no apartado anterior, ou este non fose procedente de acordo co nel indicado, e en orden ao cumprimento dos principios establecidos neste, a administración procederá a efectuar os trámites legais tendentes á extinción da relación laboral, sempre de acordo co establecido na lexislación laboral e coas consecuencias, incluídas as indemnizatorias, establecidas nela.

4.- os postos de traballo que pasen a ser desempeñados por persoal funcionario interino como consecuencia dos procesos establecidos na presente quedarán suxeitos á súa convocatoria nos concursos de traslados e aos procesos selectivos de persoal funcionario da Xunta de Galicia

5.-As necesidades de cobertura temporal que xurdan despois da transformación dos postos de traballo previstos nesta disposición serán cubertas a través das listas de contratación temporal de funcionarios."

Artigo 13.- *Postos directivos na Administración xeral da Comunidade Autónoma de Galicia*

Modifícase a alínea 4 da disposición transitoria terceira da Lei 2/2015, do 29 de abril, de Emprego Público de Galicia, que queda redactado como segue:

"4. O persoal funcionario de carreira que a partir da entrada en vigor da presente lei acceda aos postos directivos a que fai referencia esta disposición manterase na situación de servizo activo, con reserva do posto de traballo que ocupase con carácter definitivo no momento do nomeamento, se o devandito posto se tivese obtido mediante concurso."

Artigo 14.- *Postos ocupados por persoal laboral afectados pola creación de escalas*

Engádesse unha disposición transitoria décimo sexta na Lei 2/2015, do 29 de abril, de Emprego Público de Galicia, co seguinte contido:

"Disposición transitoria décimo sexta. Postos ocupados por persoal laboral afectados pola creación de escalas

1. O persoal laboral fixo que na entrada en vigor desta lei estea desempeñando postos de traballo afectados pola creación das escalas de administración xeral e especial poderá seguir a desempeñalos.
2. Entrementres non se realicen as adaptacións necesarias para a provisión dos postos de traballo por persoal funcionario mencionados no apartado anterior, poderán seguir sendo provistos con persoal laboral.”

Artigo 15.- *Provisión de postos de traballo e mobilidade*

Modifícase o artigo 7 da Lei 1/2012 de medidas temporais en determinadas materias de emprego público da Comunidade Autónoma de Galicia, que queda redactado como segue:

“Artigo 7. Provisión de postos de traballo e mobilidade

Non serán ofertados nos concursos de traslados os postos de persoal laboral afectados pola disposición transitoria decimo cuarta do texto refundido da Lei da Función Pública de Galicia, aprobado polo Decreto legislativo 1/2008, do 13 de marzo, e pola disposición transitoria décima do V Convenio colectivo de persoal laboral da Xunta de Galicia mentres non se realicen os procesos selectivos aos que se refiren as ditas disposicións.”

Artigo 16.- *Integración do persoal laboral fixo das entidades instrumentais como persoal laboral da Administración xeral da Comunidade Autónoma de Galicia e aplicación do convenio colectivo único ao persoal laboral temporal*

Modifícase a disposición adicional décimo primeira da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, que queda redactada como segue:

“Disposición adicional décimo primeira: Integración do persoal laboral fixo das entidades instrumentais como persoal laboral da Administración xeral da Comunidade Autónoma de Galicia e aplicación do convenio colectivo único ao persoal laboral temporal.

Un. O Consello da Xunta de Galicia, mediante decreto podera establecer os procedementos que habiliten a progresiva integración como persoal laboral da Administración xeral da Comunidade Autónoma de Galicia do persoal laboral fixo das entidades instrumentais ás que lles sexa aplicable esta lei que non estea sometido á normativa xeral de función pública ou ao convenio colectivo do persoal da Xunta de Galicia.

O establecemento dos devanditos procedementos e das referidas condicións de integración será negociado coas organizacións sindicais presentes na Mesa Xeral de Empregados Públicos.

A integración do persoal das entidades instrumentais do ámbito sanitario rexerase pola súa normativa específica.

Dous. Así mesmo, para homoxeneizar o réxime xurídico e condicións de traballo aplicables ao persoal, poderá negociarse coas organizacións sindicais presentes na Mesa Xeral de Empregados Públicos de Galicia a aplicación do Convenio colectivo único do persoal laboral da Xunta de Galicia, ao persoal laboral temporal das entidades indicadas no primeiro parágrafo do apartado anterior que ocupe postos de traballo que fose necesario manter. As condicións e prazos nas que se adecuarán as retribucións deste persoal ao convenio colectivo único serán iguais ás correspondentes ao persoal laboral fixo do ente que se integre como persoal laboral da Administración xeral da Comunidade Autónoma de Galicia.”

Artigo 17.- *Persoal licenciado ou diplomado da escala de saúde pública e administración sanitaria.*

O persoal funcionario de carreira licenciado ou diplomado da escala de saúde pública e administración sanitaria poderá ocupar con carácter temporal, mediante comisión de servizos voluntaria, postos de traballo dunha clase diferente á que pertenza, dentro da referida escala, sempre que a titulación de acceso da súa clase orixinaria sexa a mesma que a requirida para o posto de que se trate. En todo caso, outorgarase prioridade ao persoal funcionario que pertenza á mesma clase do posto que sexa obxecto de cobertura.

CAPÍTULO II *Rexime financeiro*

SECCIÓN PRIMEIRA *Tesoro*

Artigo 18.- *Concepto*

Modifícase o artigo 87 do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue:

“Artigo 87.-Concepto.

1. Constitúen a Tesourería da Comunidade Autónoma de Galicia tódolos recursos financeiros, sexan diñeiro, valores, créditos e os demais produtos das operacións de endebedamento da súa Administración xeral, organismos autónomos, axencias públicas autonómicas, entidades públicas empresariais e entidades públicas instrumentais de consulta ou asesoramento, que se xeren tanto por operacións orzamentarias coma extraorzamentarias.

2. As disponibilidades da Tesourería e as variacións que poidan sufrir están suxeitas ó réxime de intervención e deben ser rexistradas de conformidade coas normas de contabilidade pública. Poderán establecerse procedementos especiais de anotación en conta para aqueles movementos internos de efectivo entre as distintas contas operativas da Tesourería que determine o conselleiro competente en materia de Facenda.”

Artigo 19.- *Funcións*

Modifícase o artigo 88 do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue:

“Artigo 88.-Funcións.

Son funcións propias da Tesourería:

- a) A xestión recadatoria dos recursos e o pagamento das obrigas da Administración xeral da Comunidade Autónoma e das entidades públicas instrumentais sinaladas no artigo anterior.
- b) Instrumentar e servir ó principio de unidade de caixa, mediante a centralización de tódolos fondos e valores xerados por operacións orzamentarias e extraorzamentarias.
- c) Distribuír no tempo e no territorio as disponibilidades diñeirarias para a satisfacción puntual das obrigas da Comunidade Autónoma.
- d) Velar pola obtención da axeitada rendibilidade dos recursos dispoñibles da Comunidade Autónoma sen menoscabo dos fins propios da Tesourería.

- e) Responder dos avais contraídos pola Comunidade Autónoma conforme as disposicións desta lei.
- f) As demais funcións que se deriven ou relacionen coas anteriores enumeradas."

Artigo 20.- *Situación dos fondos da Comunidade Autónoma*

Modifícase o artigo 89 do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue:

"Artigo 89.-Situación dos fondos da Comunidade Autónoma.

1. Con carácter xeral a Tesourería da Comunidade Autónoma situará os fondos públicos no Banco de España ou nas entidades de crédito e aforro que operen en Galicia, en contas das que, en todo caso, posuira a titularidade.
2. A Tesourería da Comunidade Autónoma poderá instrumentar todas aquelas operacións activas que considere convenientes para manter a adecuada rendibilidade dos fondos ó seu cargo, guiada en todo caso polo principio de seguridade na súa colocación.
3. O réxime xeral de autorizacións para a situación e colocación de fondos, a natureza das contas, o control e a disposición dos fondos e dos servizos de colaboración que se vaian concertar coas entidades financeiras indicadas no parágrafo anterior establecerá a consellería competente en materia de Facenda."

Artigo 21.- *Situación dos fondos das entidades públicas instrumentais*

Modifícase o artigo 90 do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue:

"Artigo 90.-Situación dos fondos das entidades públicas instrumentais.

1. Os fondos dos organismos autónomos, das axencias públicas autonómicas e das entidades públicas empresariais, así como das entidades públicas instrumentais de consulta e asesoramento, situaranse en contas diferenciadas coa autorización expresa da consellería competente en materia de Facenda e baixo o control da Tesourería, utilizando rúbricas que conteñan a denominación xeral de « Entidades públicas instrumentais da Comunidade Autónoma de Galicia», tendo a consideración, para tódolos efectos, de fondos da propia Tesourería.
2. Os ditos fondos poderán estar situados no Banco de España ou noutras entidades de crédito e aforro que operen en Galicia, necesitando autorización expresa da consellería competente en materia de Facenda para a apertura de cada conta e para a

determinación das súas condicións de funcionamento, logo de solicitude motivada y con expresión da finalidade da súa apertura.

A Tesourería da Comunidade Autónoma poderá recabar do órgano administrativo xestor calquera dato tendente a comprobar o cumprimento das condicións nas que se autorizou a apertura da conta e poderá ordenar a súa cancelación ou suspender a súa utilización si se comprobase que non subsisten as condicións que motivaron a autorización de apertura.

3. As entidades financeiras indicadas no parágrafo primeiro, teñen para coa Tesourería da Comunidade Autónoma, á súa solicitude, as mesmas obrigas de información que para coas consellerías e as entidades públicas instrumentais titulares das contas abertas nelas.

4. A consellería competente en materia de Facenda poderá propoñerlle ó Consello da Xunta que as operacións de ingreso e de ordenación e realización material do pagamento das entidades públicas instrumentais ás que lles sexa de aplicación o disposto neste artigo, as realice a dirección xeral competente en materia de Tesourería, para o cal se establecerá o correspondente procedemento.

5. O disposto no presente artigo será tamén de aplicación ás entidades instrumentais ás que fai referencia a disposición transitoria terceira da Lei 16/2010, de 17 de decembro, de organización e funcionamento da Administración xeral e do sector público autonómico de Galicia, que aínda non adaptaran a súa regulación ás determinacións do Título III da citada lei.”

Artigo 22.- *Ingresos e medios de pagamento.*

Modifícase o artigo 91 do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue:

“Artigo 91.-Ingresos e medios de pagamento.

1. Os ingresos a favor da Tesourería poderán realizarse no Banco de España, nas caixas da propia Tesourería ou das súas entidades colaboradoras, ou ben nas que se habiliten nas entidades públicas instrumentais as que se fai referencia no artigo anterior.

2. Os medios de pagamento admisibles polas caixas da Tesourería poderán consistir en diñeiro de curso legal, cheques nominativos, xiros, transferencias ou calquera outro medio de pagamento legalmente establecido. A consellería competente en materia de Facenda establecerá as condicións que terán que cumprir e o momento no que en cada caso se producirá a liberación da débeda.

3. A Tesourería poderá darlles cumprimento ás súas obrigas por calquera dos medios de pagamento a que se fai referencia no parágrafo anterior.”

Artigo 23.- *Prescrición dos depósitos constituídos ante a Caixa Xeral de Depósitos da Comunidade Autónoma*

Engádesse un novo artigo 91 bis no texto refundido da Lei de réxime financeiro e orzamentario de Galicia, aprobado polo Decreto lexislativo 1/1999, do 7 de outubro, co seguinte contido:

“Artigo 91 bis.- Prescrición dos depósitos constituídos ante a Caixa Xeral de Depósitos da Comunidade Autónoma.

Os depósitos en metálico constituídos ante a Caixa Xeral de Depósitos da Comunidade Autónoma prescribirán conforme ás disposicións do Código Civil. Transcorrido o prazo de prescrición, a dirección xeral competente na xestión da Tesourería poderá declárala mediante resolución que se publicará no Diario Oficial de Galicia. Aos fondos así adquiridos daráselles o destino que se determina na presente lei.”

Artigo 24.- *Fluxos financeiros*

Modifícase o artigo 92 do texto refundido da Lei de réxime financeiro e orzamentario de Galicia, aprobado polo Decreto lexislativo 1/1999, do 7 de outubro, que queda redactado como segue:

“Artigo 92.-Fluxos financeiros.

Para unha mellor xestión da Tesourería e unha adecuada análise do seu funcionamento, deberase elaborar trimestralmente un cadro de seguimento dos fluxos financeiros derivados da actividade do sector público autonómico afectado polo disposto neste título, no marco das previsións dun orzamento monetario.”

SECCIÓN SEGUNDA *Xestión orzamentaria*

Artigo 25.- *Xestión orzamentaria*

Modifícase a alínea 2 do artigo 14 da Lei 2/2011, do 16 de xuño, de disciplina orzamentaria e sustentabilidade financeira, que queda redactado como segue:

“2. As consellerías e as entidades instrumentais do sector público autonómico deberán elaborar unha adecuada planificación dos investimentos públicos que pretenden realizar a medio prazo, axustándose aos obxectivos estratéxicos de cada un dos programas orzamentarios que xestionan, á sustentabilidade dos servizos públicos e aos seus escenarios plurianuais de gasto.

A tal efecto, os expedientes de autorización de investimentos do sector público autonómico, ou a modificación orzamentaria que os financie, deberán acompañar unha memoria, co alcance e contido que se estableza por orde da consellería competente en materia de facenda, na que se cuantifique o custo total do investimento e as implicacións no gasto corrente dos exercicios futuros que o seu normal funcionamento implica.”

CAPÍTULO III *Procedemento Administrativo*

SECCIÓN PRIMEIRA: *Administración dixital*

Artigo 26.- *Información administrativa do cidadán*

Un.- Para dar cumprimento ao desenvolvemento da Lei 39/2015, do 1 de outubro, do Procedemento Administrativo Común das Administracións Públicas, a Carpeta do cidadán da Administración xeral e das entidades do sector público autonómico configúrase como o conxunto de información e documentos en formato electrónico relativos as relacións administrativas coas persoas interesadas. A dita Carpeta estará dispoñible para a persoa interesada, na sede electrónica da Xunta de Galicia (<https://sede.xunta.gal>) e nas canles que se establezan.

Dous.- A Carpeta do cidadán co obxectivo de dar cumprimento ao dereito de información e orientación ao interesado, tanto persoas físicas como xurídicas, nos procedementos administrativos, nos termos establecidos na Lei 39/2015, ofrecerá, entre outros servizos, información personalizada aos cidadáns e empresas do estado de tramitación dos seus expedientes na Administración xeral e nas entidades do sector público autonómico, os seus asentos rexistrais, as transmisións de datos entre administración relativas aos seus expedientes, ou os seus datos e documentos recollidos pola administración. Asimesmo permitirá a realización de distintos trámites administrativos, así como o acceso aos documentos dos seus expedientes.

Tres.- Os distintos órganos e entidades que integran a Administración xeral e o sector público autonómico garantirán a permanente actualización da información e contidos da Carpeta do cidadán. Aos efectos do disposto no presente artigo, quedan autorizadas as cesións e comunicacións dos datos de carácter persoal necesarios para dar cumprimento ao devandito dereito do interesado.

Catro.- Así mesmo, estes órganos e entidades poderán acceder ao contido da Carpeta co obxecto de garantir o dereito dos interesados de non achegar documentación que xa obre en poder da administración, así como para prestar servizos de asistencia ao cidadán na relación coa administración, sempre que o interesado expresase o seu consentimento para que sexan consultados ou obtidos eses documentos.

Cinco.- De conformidade coa normativa en materia de protección de datos, os datos persoais relativos á Carpeta do cidadán serán incluídos nun ficheiro, cuxa finalidade é a xestión dos servizos da Carpeta do cidadán.

Seis. O previsto no presente artigo será de aplicación sen prexuízo do disposto na Disposición Adicional Primeira da Lei 39/2015, de 1 de outubro, do procedemento administrativo común das administracións públicas, e do previsto na Lei 58/2003, de 17 de decembro, xeral tributaria.

Artigo 27.- *Sistema de Notificacións Electrónicas de Galicia*

Un.- As notificacións da Administración xeral e do sector público autonómico serán preferentemente electrónicas, conforme cos termos da lexislación básica estatal, e realizaranse na sede electrónica da Xunta de Galicia ou no enderezo electrónico habilitado único que a Administración pública galega pon a disposición da cidadanía a través do Sistema de Notificación Electrónica de Galicia.

Dous.- A dirección de referencia do Sistema de Notificación Electrónica de Galicia é <https://notifica.xunta.gal/>. O acceso ao sistema estará tamén dispoñible no portal web institucional da Xunta de Galicia (www.xunta.gal), e na sede electrónica (<https://sede.xunta.gal>).

A xestión tecnolóxica do sistema de notificacións electrónicas corresponderá á Axencia para a Modernización Tecnolóxica de Galicia, ou órgano ou entidade que asuma as súas competencias. Corresponderá a cada órgano ou entidade da Administración xeral e do sector público autonómico a súa aplicación á xestión dos distintos procedementos administrativos do seu ámbito de competencia.

Logo de autorización do Consello da Xunta de Galicia, a Axencia para a Modernización Tecnolóxica de Galicia poderá modificar os enderezos electrónicos de referencia do sistema mediante a publicación no Diario Oficial de Galicia dunha resolución que estableza as novos enderezos.

Tres.- O sistema informará aos interesados dos requirimentos técnicos cos que debe contar para garantir o adecuado acceso ao sistema, sendo responsabilidade dos interesados contar cos medios axeitados para isto.

Catro.- Nos casos de non funcionamento do sistema por razóns de imposibilidade técnica no envío ou posta a disposición, derivada de caso fortuíto, forza maior ou outras incidencias técnicas, as notificacións que se teñan que realizar na sede electrónica da Xunta de Galicia ou no enderezo electrónico habilitado único, mentres non se restableza o sistema, poderán efectuarse, a xuízo do órgano que tramite o procedemento, e atendendo ao cumprimento dos prazos de resolución e ás circunstancias concorrentes, por medios non

electrónicos, de acordo co establecido na lexislación básica, en calquera lugar adecuado a tal fin, en papel ou por calquera medio que permita ter constancia da recepción polo interesado ou o seu representante, así como da data, a identidade e o contido do acto notificado.

Cinco.- Aos efectos do acceso ao contido das notificacións polos interesados, o sistema informará das indispoñibilidades do servizo planificadas, así como das interrupcións non planificadas derivadas de incidencias técnicas do sistema. O sistema proverá aos interesados que así o soliciten do oportuno xustificante electrónico de indispoñibilidade que exprese os períodos de interrupción, aos efectos, no seu caso, da súa presentación polo interesado no correspondente procedemento e a xustificación ante o órgano competente para a súa tramitación da imposibilidade de cumprimento dos prazos dentro deste e petición da súa ampliación, se así procedese.

Seis.- En todo caso, de acordo co establecido na normativa básica estatal, con independencia do medio utilizado, as notificacións serán válidas sempre que permitan ter constancia do seu envío ou posta a disposición, da recepción ou acceso polo interesado ou o seu representante, das súas datas e horas, do contido íntegro, e da identidade fidedigna do remitente e destinatario da mesma. A acreditación da notificación efectuada incorporase ao expediente.

Sete.- Os criterios de obrigatoriedade da notificación electrónica a través do Sistema de Notificacións electrónicas de Galicia previstos nesta lei serán de aplicación para os expedientes administrativos iniciados a partir da entrada en vigor da Lei 39/2015, do 1 de outubro, do Procedemento Administrativo Común das Administracións Públicas.

Artigo 28.- *Interesados que non están obrigados a relacionarse a través de medios electrónicos coa administración*

Un.- Os interesados que non estean obrigados de acordo coa normativa básica a relacionarse por medios electrónicos coa administración, poderán solicitar a creación do seu enderezo habilitado único a través do Sistema de Notificación de Electrónica de Galicia, mediante os modelos normalizados dispoñibles a estes efectos no propio sistema, aos efectos de recibir a partir dese momento as notificacións a través de medios electrónicos en calquera procedemento administrativo tramitado pola Administración xeral e do sector público autonómico.

Dous.- En particular, nos procedementos iniciados a solicitude do interesado, cando o interesado elixa no modelo normalizado de solicitude que a notificación nese procedemento se practique por medios electrónicos, a administración creará o seu enderezo habilitado único.

Tres.- A creación do seu enderezo electrónico habilitado nos casos dos dous números anteriores implicará que as notificacións que deban cursarse co interesado realizaranse preferentemente por vía electrónica, de acordo co establecido na normativa básica, sen prexuízo do seu dereito a decidir e comunicar en calquera momento á Administración Pública, mediante os modelos normalizados dispoñibles no sistema ao efecto, que as notificacións sucesivas se deixen de practicar medios electrónicos. En particular, nos sucesivos procedementos iniciados a solicitude do interesado, a notificación en cada un deles practicarase polo medio sinalado ao efecto por aquel no modelo normalizado de solicitude.

Catro.- Aos efectos do disposto na lexislación básica, a Administración autonómica, no momento no que se teña que practicar a un interesado dos previstos neste artigo unha notificación en papel, porá tamén a disposición do interesado a través da sede electrónica o contido da notificación para que poida acceder a este de forma voluntaria e poderá dar de alta de oficio o enderezo electrónico habilitado do interesado no caso de que non o teña. A información relativa a este extremo poderá incluírse na notificación en papel.

Cinco.- Os modelos normalizados do Sistema de Notificación Electrónica de Galicia aos que se refiren os números 1 e 3 deste artigo estableceranse pola Axencia para a Modernización Tecnolóxica de Galicia, ou órgano ou entidade que asuma as súas competencias, mediante a súa posta a disposición en formato electrónico no propio sistema, sendo de uso obrigatorio para os interesados.

A aprobación dos modelos normalizados de solicitude nos concretos procedementos iniciados a solicitude do interesado ao que se refiren os números 2 e 3 corresponderá ao órgano competente en cada procedemento, tras o cumprimento dos trámites establecidos regulamentariamente para a habilitación de procedementos electrónicos.

Artigo 29.- *Interesados que están obrigados a relacionarse a través de medios electrónicos coa administración.*

Un.- No caso de interesados que, de acordo coa normativa básica, estean obrigados a relacionarse a través de medios electrónicos coa administración, deberán crear e manter o seu enderezo electrónico habilitado único a través do Sistema de Notificación Electrónica

de Galicia, para todos os procedementos administrativos tramitados pola Administración xeral e o sector público autonómico. En todo caso, a Administración xeral poderá de oficio crear o indicado enderezo, aos efectos de asegurar o cumprimento polos indicados interesados da súa obriga de relacionarse por medios electrónicos.

Dous.- En particular, nos procedementos iniciados a solicitude dos interesados previstos neste artigo, deberá optarse en todo caso no modelo normalizado de solicitude pola notificación por medios electrónicos, sen que sexa válida para eles, nin produza efectos no procedemento, unha opción diferente.

Tres.- Nos procedementos iniciados de oficio, nos casos nos que os interesados previstos neste artigo non teñan creado o seu enderezo electrónico habilitado único, este será creado de oficio pola Administración xeral, de acordo co indicado no número 1, e practicaranse nel as correspondentes notificacións. O órgano competente para a tramitación do procedemento, aos efectos de facilitar a posta disposición daqueles dos canais de acceso necesarios e os sistemas e aplicacións previstos nesta lei, poderá practicar unha comunicación en papel no seu domicilio, recordando ao interesado a súa obriga de relacionarse por medios electrónicos coa administración, informándolle da creación de oficio do enderezo electrónico habilitado único, a forma de acceso ao sistema, e indicando que ten dispoñible nela a notificación electrónica, así como as consecuencias legais de non acceso no tempo establecido na lexislación básica. Así mesmo, cando á Administración xeral e do sector público autonómico lle constase a súa dirección de correo electrónico e/ou dispositivo electrónico, adicionalmente á comunicación en papel, a administración poderá avisarlle neles do envío ou posta a disposición da notificación.

Artigo 30.- *Obrigatoriedade de practicar electronicamente as notificacións para determinados procedementos*

Un.- De acordo coa lexislación básica, regulamentariamente poderá establecerse a obriga de practicar electronicamente as notificacións para determinados procedementos e para certos colectivos de persoas físicas que por razón da súa capacidade económica, técnica, dedicación profesional ou outros motivos quede acreditado que teñen acceso e dispoñibilidade dos medios electrónicos necesarios.

Dous.- En particular, nos procedementos para a concesión de axudas e subvencións, as correspondentes bases reguladoras poderán establecer a indicada obriga, sempre que se xustifique nelas a concorrencia das circunstancias indicadas no número anterior, de acordo coa memoria que ao efecto se inclúa no procedemento seguido para a súa aprobación.

Artigo 31.- *Colaboración con outras administracións públicas e interoperabilidade do Sistema de Notificacións Electrónicas de Galicia*

Un.- O Sistema de Notificacións Electrónicas de Galicia estará dispoñible para outras administracións públicas, e en especial, para as Administracións locais galegas e entes públicos instrumentais dependentes delas, nos termos que se acorden con elas, permitindo a existencia dun enderezo electrónico habilitado único. En particular, nos convenios de adhesión ao sistema poderá preverse a existencia dunha compensación económica para o órgano xestor do sistema polos gastos que se deriven da colaboración.

Dous.- O Sistema de Notificacións de Galicia preverá os mecanismos necesarios para a interoperabilidade das notificacións con outras administracións ou sistemas de notificacións en uso en outras administracións públicas do Estado.

Artigo 32.- *Adaptación e actualización dos modelos normalizados de tramitación*

Os modelos normalizados aplicables na tramitación de procedementos, para a súa utilización en papel ou en formato electrónico, poderán ser modificados co obxecto de mantelos adaptados e actualizados e, en particular, co obxecto de adaptalos ao establecido nesta lei. A estes efectos será suficiente a publicación dos modelos adaptados ou actualizados na sede electrónica da Xunta de Galicia, onde estarán permanentemente accesibles para todas as persoas interesadas, sen que sexa necesaria a súa nova publicación no Diario Oficial de Galicia.

SECCIÓN SEGUNDA *Réxime sancionador e prazos de procedementos administrativos*

Artigo 33.- *Infraccións administrativas*

Un.- Engádesse unha nova alínea I bis ao artigo 53 da Lei 9/2013, do 19 de decembro, do emprendemento e da competitividade económica de Galicia, co seguinte contido:

“I bis. O exceso nos horarios establecidos para os establecementos e actividades a que se refire o Título III, capítulo III, sección 2ª, da presente lei. ”

Dous.- Modifícase a letra n) do artigo 116 da Lei 3/2012, do 2 de abril, do deporte de Galicia, que queda redactado como segue:

“n) A obstrución ou resistencia reiterada ao exercicio da función inspectora, ou da función de control da Administración deportiva sobre as entidades deportivas.”

Artigo 34.- *Prazos no procedemento sancionador en materia de transporte marítimo de persoas en augas interiores de Galicia*

O prazo máximo en que debe notificarse a resolución do procedemento sancionador en materia de transporte marítimo de persoas en augas interiores de Galicia será dun ano contado desde a data do acordo de incoación do procedemento.

Artigo 35.- *Prazos para notificar as resolucións de diversos procedementos en materia de vivenda.*

Engádese unha disposición adicional décimo novena á Lei 8/2012, do 29 de xuño, de vivenda de Galicia, co seguinte contido:

“Décimo novena.- Prazos para notificar as resolucións de diversos procedementos en materia de vivenda.

As resolucións dos procedementos de desafuizamento administrativo e de adxudicación de vivendas protexidas de promoción pública, deberán notificarse no prazo máximo dun ano.”

Artigo 36.- *Prazos para notificar as resolucións de diversos procedementos en materia de sanidade*

Modifícase a alínea 8 do artigo 39 da Lei 8/2008, do 10 de xullo, de Saúde de Galicia, que queda redactado como segue:

“8. O prazo máximo para notificar as resolucións sancionadoras por infraccións en materia sanitaria será de nove meses, sempre e cando non exista unha norma específica reguladora do procedemento de que se trate que estableza un distinto 5.”

SECCIÓN TERCEIRA *Adecuación normativa*

Artigo 37.- *Disposicións de adecuación da normativa da Comunidade Autónoma de Galicia en materia sancionadora á Lei 39/2015, de 1 de outubro, do procedemento administrativo común das Administracións Públicas, e á Lei 40/2015, de 1 de outubro, de réxime xurídico do sector público*

Un.- O prazo máximo para resolver e notificar os procedementos sancionadores competencia da Administración Xeral da Comunidade Autónoma e das súas entidades públicas instrumentais, será de 6 meses contados desde o ditado do acordo de inicio, salvo aqueles casos nos que a normativa legal ou regulamentaria reguladora do procedemento estableza un prazo específico diferente. Esta previsión será de aplicación a todos os procedementos sancionadores iniciados a partir da entrada en vigor desta lei.

Dous.- En relación aos recursos interpostos fronte a resolucións administrativas sancionadoras, presentados e non resoltos con anterioridade á entrada en vigor da Lei 39/2015, de 1 de outubro, e da Lei 40/2015 de 1 de outubro, consonte co indicado na normativa básica, e en particular, co disposto nos artigos 26.2 e 30.3 da citada lei 40/2015, o prazo previsto para prescrición da sanción comezará a contarse desde o día seguinte a aquel en que finalice o prazo legalmente previsto para a resolución do dito recurso, aínda que o prazo en cuestión finalizase con anterioridade á entrada en vigor das dúas leis mencionadas, e con independencia do previsto na lexislación sectorial para os procedementos sancionadores de que se trate, cando a dita lexislación sexa anterior as citadas leis de procedemento administrativo común das Administracións Públicas, e de réxime xurídico do sector público.

Tres.- En caso de tratarse de resolucións administrativas sancionadoras e de restitución da legalidade urbanística, o acto administrativo que resolva o recurso interposto fronte ás ditas resolucións e que dispoña, no seu caso, a prescrición da sanción do acordo co establecido no apartado anterior, deberá pronunciarse expresamente sobre o acto administrativo de restitución da legalidade segundo a normativa aplicable e, en particular, tendo en conta os prazos de prescrición indicados nela para a dita restitución, sen que a estes prazos lles sexa aplicable o previsto neste artigo para os prazos de prescrición da sanción.

Artigo 38.- *Recursos interpostos contra resolucións de expedientes sancionadores e de reposición da legalidade por infraccións reguladas na normativa en materia de costas, cometidas na zona de servidume de protección do dominio público marítimo terrestre pendentes de resolución á entrada en vigor da Lei 39/2015, de 1 de outubro, do procedemento administrativo común das Administracións Públicas, e da Lei 40/2015, de 1 de outubro, de réxime xurídico do sector público*

Un.- En consonancia, coa lexislación básica estatal, nos recursos interpostos contra resolucións de expedientes sancionadores e de reposición da legalidade por infraccións reguladas na normativa en materia de costas, cometidas na zona de servidume de protección do dominio público marítimo terrestre, o prazo previsto para prescrición da sanción comezará a contarse desde o día seguinte a aquel en que finalice o prazo legalmente previsto para a resolución do recurso de alzada, aínda que o prazo en cuestión finalizase con anterioridade á entrada en vigor da Lei 39/2015, de 1 de outubro, do procedemento administrativo común das Administracións Públicas, e da Lei 40/2015, de 1 de outubro, de réxime xurídico do sector público.

Dous.- Nos supostos sinalados no apartado anterior, nos recursos pendentes de resolución, o prazo de prescrición de 15 anos, en consonancia co disposto na Lei 2/2013, do 29 de maio, de protección e uso sostible do litoral, que modifica o artigo 95 da Lei estatal 22/1988, do 28 de xullo de costas, en canto á reposición ou restitución da legalidade, comezará a computarse, dende que a administración ditou o acto no que se acordou a obriga de restitución.

Tres.- A resolución administrativa que resolva os recursos de alzada nos supostos previstos no presente artigo acordará de oficio a prescrición da sanción imposta, no seu caso, e deberá pronunciarse expresamente sobre a prescrición da restitución da legalidade segundo o indicado no número anterior.

Nos supostos nos que se declare a prescrición da medida de restitución da legalidade, nas obras, edificios, construcións ou instalacións afectados situados dentro da servidume de protección, e sen prexuízo do que se dispoña na lexislación básica estatal, consideraranse aos efectos urbanísticos e como norma adicional de protección do medio ambiente, na situación de fora de ordenación de acordo co réxime específico previsto no número seguinte deste artigo.

Catro.- Nas obras, edificios, construcións ou instalacións afectados situados dentro da servidume de protección indicadas no número anterior, e sempre que resulte compatible coa lexislación básica estatal, só poderán realizarse, previa a solicitude de autorización do órgano autonómico competente en materia de zona de servidume de protección, obras imprescindibles para a conservación e o mantemento do uso preexistente, sen que poidan incrementar o valor expropiatorio. Na resolución que declare a prescrición recollerase expresamente a suxeición ao réxime específico establecido neste artigo.

Artigo 39.- *Aplicación da normativa en materia de Protección dos Consumidores da Lei 2/2012, do 28 de marzo, galega de protección xeral das persoas consumidoras e usuarias*

Engádese unha nova disposición adicional sexta na Lei 2/2012, do 28 de marzo, galega de protección xeral das persoas consumidoras e usuarias, co seguinte contido:

“Disposición adicional sexta

1. Ao amparo do disposto na Disposición Adicional Primeira da Lei 39/2015, do 1 de outubro, do Procedemento Administrativo Común das Administracións Públicas, o réxime sancionador regulado na lei 2/2012, do 28 de marzo, galega de protección xeral das persoas consumidoras e usuarias, rexerase por esta lei especial por razón da materia en canto regule trámites adicionais ou distintos do procedemento administrativo común ou non esixa algún dos trámites previstos naquela Lei 39/2015, todo elo sen prexuízo do obrigado respecto á lexislación básica.

2. Á vista do disposto no artigo 1 da Lei 40/2015, do 1 de outubro, de Réxime Xurídico do Sector Público, o réxime sancionador regulado na lei 2/2012, do 28 de marzo, galega de protección xeral das persoas consumidoras e usuarias, rexerase por esta lei especial por razón da materia como desenvolvemento das bases da potestade sancionadora reguladas naquela Lei 39/2015, todo elo sen prexuízo do obrigado respecto á lexislación básica. En todo caso, a remisión prevista no artigo 30 da Lei 40/2015 ás leis que establezan as infraccións e sancións en canto á súa prescrición, deberá entenderse referida á regulación prevista a estes efectos na lei 2/2012.”

Artigo 40.- *Silencio administrativo en determinados procedementos en materia de persoal*

Nos procedementos iniciados por solicitudes ou reclamacións en materia de persoal, con contido retributivo, formulados polos empregados públicos da administración xeral e do sector público autonómico de Galicia que teñan repercusión no capítulo I do orzamento de gastos da comunidade autónoma, o silencio administrativo producirá efectos desestimatorios.

SECCIÓN CUARTA *Réxime administrativo*

Artigo 41.- *Responsabilidades dos membros dos consellos de administración das sociedades mercantís públicas autonómicas ou dos padroados das fundacións públicas autonómicas ou membros das entidades ou órganos liquidadores dun ente do sector público autonómico*

Engádese unha nova disposición adicional décimo quinta á Lei 16/2010, do 17 de decembro, de organización e funcionamento da Administración xeral e do sector público autonómico de Galicia, co seguinte contido:

“Décimo quinta.- Responsabilidades dos membros dos consellos de administración das sociedades mercantís públicas autonómicas ou dos padroados das fundacións públicas autonómicas ou membros das entidades ou órganos liquidadores dun ente do sector público autonómico

1. A responsabilidade que lle corresponda ás autoridades e persoal ao servizo da Administración xeral e do sector público autonómico de Galicia como membro do consello de administración das sociedades mercantís públicas autonómicas ou do padroado das fundacións públicas autonómicas será directamente asumida pola Administración ou ente do sector público que o designara.

2. A Administración ou ente do sector público autonómico poderá esixir de oficio ao que designou como membro do consello de administración ou do padroado a responsabilidade en que incorrese polos danos e prexuízos causados nos seus bens ou dereitos cando concorrese dolo, ou culpa ou neglixencia graves, conforme o previsto nas leis administrativas en materia de responsabilidade patrimonial.

3. A responsabilidade que lle corresponda ás autoridades e persoal ao servizo da Administración xeral e do sector público autonómico de Galicia como membro da entidade ou órgano liquidador dun ente do sector público autonómico será directamente asumida pola Administración ou ente do sector público que o designou, quen poderá esixir de oficio a tal designado a responsabilidade que, en su caso, corresponda cando concorrese dolo, ou culpa ou neglixencia graves, conforme o previsto nas leis administrativas en materia de responsabilidade patrimonial.”

Artigo 42.- *Ordenación das competencias de execución da Comunidade Autónoma respecto do control metrolóxico de instrumentos en servizo*

Un.- As actividades relacionadas co control metrolóxico de instrumentos en servizo de competencia da Comunidade Autónoma de Galicia serán exercidas pola propia Administración autonómica ou, no seu caso, polos organismos autorizados de verificación metrolóxica que se designen, de acordo co previsto no artigo 8.5 da Lei 32/2014, do 22 de decembro, de Metroloxía, e no artigo 8, números 1 e 6, do Real decreto 244/2016, do 3 de xuño, polo que se desenvolve a dita lei.

Dous.- A Administración autonómica poderá realizar as ditas actividades:

- a) Directamente, a través dos órganos da Administración xeral con competencias en materia de industria ou mediante as entidades instrumentais que teñan o carácter de medios propios instrumentais e servizos técnicos.
- b) Indirectamente mediante contrato, de conformidade con la lexislación de contratos do sector público.

Tres.- Como consecuencia do indicado nos números anteriores, continuará a execución do contrato, actualmente existente, de xestión de servizos públicos, na modalidade de concesión, consistente no control metrolóxico de diversos equipos de medida na fase de instrumentos en servizo no ámbito territorial da Comunidade Autónoma de Galicia. O anterior enténdese sen prexuízo da actuación, no territorio autonómico, de organismos autorizados de verificación metrolóxica que poidan designarse, de acordo co réxime imposto pola normativa estatal en materia de control metrolóxico.

Catro.-No caso de que a efectiva realización, no ámbito territorial da Comunidade Autónoma de Galicia, de actividades de verificación metrolóxica por organismos autorizados de verificación metrolóxica designados conforme ao procedemento previsto na Lei 32/2014, do 22 de decembro, de Metroloxía, e no Real decreto 244/2016, do 3 de xuño, polo que se desenvolve a dita lei, supuxese un desequilibrio económico acreditado do contrato ao que se alude no número 3 desta disposición, o concesionario poderá solicitar o restablecemento do equilibrio económico. Neste caso, comprobada polo órgano de contratación a existencia dun desequilibrio económico, este adoptará as medidas procedentes para o restablecemento do equilibrio económico do contrato, conforme ao disposto na lexislación de contratos do sector público. As ditas medidas poderán consistir na modificación das tarifas a aboar polas persoas usuarias, na redución do prazo do contrato ou, en xeral en calquera modificación das cláusulas de contido económico incluídas no contrato, de xeito que este poida seguir desenvolvéndose co mesmo equilibrio económico existente no momento da súa celebración.

O indicado anteriormente entenderase sen prexuízo da posibilidade de modificar o contrato de acordo cos límites da lexislación de contratos do sector público, ou da súa resolución se nin o reequilibrio económico nin a modificación contractual fosen posibles.

As anteriores medidas, limitadas ao estrito marco contractual, entenderanse sen prexuízo da responsabilidade patrimonial, no seu caso, polos danos derivados da aplicación do novo marco normativo en materia de metroloxía, que será exixible, cando se dean os supostos constitucionais e legais para o seu exercicio, ante os órganos competentes.

Artigo 43.- *Autorización administrativa.*

Modifícase a letra f) do artigo 6 da Lei 14/1985, reguladoras dos xogos e apostas de Galicia, que queda redactado como segue:

“f) Apostas que sexan expresión ou consecuencia do resultado dun acontecemento previamente determinado, de desenlace incerto e alleo as persoas apostantes.”

CAPÍTULO IV *Vivenda*

Artigo 44.- *Solo para vivendas protexidas*

Engádese unha alínea 3 do artigo 72 da Lei 8/2012, do 29 de xuño, de vivenda de Galicia, co seguinte contido:

“3. No suposto de que o Instituto Galego da Vivenda e Solo, no desenvolvemento dunha actuación de solo residencial, adquira ou permute vivendas incompatibles coa nova ordenación, as persoas propietarias ou usufrutuarias, sempre que residan nestas vivendas, poderán acceder directamente ás parcelas de uso residencial para construción de vivenda unifamiliar ou ás vivendas protexidas que se promovan no ámbito sen necesidade de ter que cumprir os requisitos de acceso a estas vivendas debendo, en todo caso, destinalas a residencia habitual e permanente.”

CAPÍTULO V *Economía e Industria*

SECCIÓN PRIMEIRA *Minaría*

Artigo 45.- *Catastro Mineiro de Galicia*

Un.- Modifícase a alínea 2 do artigo 9 da Lei 3/2008, de 23 de maio, de ordenación da minaría de Galicia, que queda redactado como segue:

“2. Os datos reflectidos no Rexistro Mineiro de Galicia incorporaranse ao Catastro Mineiro de Galicia, que constituirá información de apoio para a xestión interna e a definición da política mineira da comunidade autónoma. A xestión do Catastro Mineiro de Galicia corresponde a Cámara Oficial Mineira de Galicia.”

Dous.- Modifícase a alínea 1 do artigo 14 da Lei 3/2008, de 23 de maio, de ordenación da minaría de Galicia,, que queda redactado como segue:

“1. Para a elaboración de instrumentos de planificación con incidencia na minaría teranse en conta as solicitudes e os dereitos mineiros outorgados ou concedidos no territorio da Comunidade Autónoma de Galicia, para o cal será obrigatorio solicitar un certificado do Catastro Mineiro de Galicia.”

Tres.- Engádese unha nova disposición adicional quinta na Lei 3/2008, de 23 de maio, de ordenación da minaría de Galicia, co seguinte contido:

“Disposición adicional quinta. Censo Catastral Mineiro

O Censo Catastral Mineiro de Galicia, xestionado pola Cámara Oficial Mineira de Galicia, se constitúe no Catastro Mineiro de Galicia ao que fai referencia o artigo 9.”

SECCIÓN SEGUNDA *Consumo*

Artigo 46.- *Concepto de consumidor.*

Modifícase a alínea 1 do artigo 3 da Lei 2/2012, do 28 de marzo, galega de protección xeral das persoas consumidoras e usuarias, que queda redactado como segue:

“1. Aos efectos desta norma son consumidores as persoas físicas que actúen cun propósito alieo á súa actividade comercial, empresarial, oficio ou profesión.

Son tamén consumidores a efectos desta norma as persoas xurídicas e as entidades sen personalidade xurídica que actúen sen ánimo de lucro nun ámbito alieo a unha actividade comercial ou empresarial.

Non obstante o anterior, en todo caso terá a condición de consumidor aquela persoa ou entidade que teña dita consideración segundo o Dereito da Unión Europea ou a norma de transposición deste ao ordenamento xurídico interno, así como toda persoa, física ou xurídica, pública ou privada, calquera que sexa a súa nacionalidade ou residencia, que adquira ou utiliza, ou á cal se lle oferta, como destinatario final, un ben, calquera que sexa a súa natureza, ou un servizo, calquera que sexa a forma e a actividade en que consista, incluídos aqueles servizos de adquisicións, depósitos ou prenda de bens ou dereitos dos consumidores e calquera que sexa a natureza, pública ou privada, individual ou colectiva, daqueles que os produzan, importen, faciliten, fornezan ou expidan, sempre que o seu destino final sexa o seu uso persoal, familiar ou colectivo, alieo a unha actividade empresarial, profesional ou artesanal.”

SECCIÓN TERCEIRA *Comercio Interior*

Artigo 47.- *Composición do Consello Galego de Comercio*

Un.- Modifícase alínea 3 do artigo 20 da Lei 13/2010, do 17 de decembro, de Comercio Interior de Galicia, que queda redactada como segue:

“3. Para os efectos de emitir a proposta de resolución da autorización comercial autonómica, o Comité Executivo de Comercio Interior e Exterior, do Consello Galego de Economía e Competitividade previsto na Lei 9/2013, do 19 de decembro, do emprendemento e da competitividade económica de Galicia, constituirase en comisión consultiva da cal formarán parte, ademais da persoa que ocupa a súa presidencia os seguintes membros do Comité:

- O representante da Federación Galega de Municipios e Provincias.
- O representante do Consello Galego de Consumidores e Usuarios.

Completarase a súa composición cos seguintes membros:

Dúas persoas representantes do órgano competente en materia de comercio

Un representante do órgano competente en materia de infraestruturas.

Un representante do órgano competente en materia de urbanismo e ordenación do territorio.

Un representante do órgano competente en materia de medio ambiente.

Secretaría: unha persoa funcionaria da dirección xeral competente en materia de comercio, que actuará como tal con voz e sen voto.”

CAPÍTULO VI AGRICULTURA

SECCIÓN PRIMEIRA Montes

Artigo 48.- *Concepto de monte ou terreo forestal*

Un.- Modifícase a letra e) da alínea 2 e a alínea 3 do artigo 2 da Lei 7/2012, do 28 de xuño, de montes de Galicia, que queda redactado como segue:

“e) Os terreos rústicos de especial protección agropecuaria, sen prexuízo do establecido no apartado seguinte deste artigo e no artigo 61 desta lei.”

“3. En todas as categorías de solo rústico de especial protección os aproveitamentos forestais rexeranse polo disposto nesta lei, en todo aquilo en que non se lles aplique a súa normativa específica.”

Artigo 49.- *Do procedemento de deslindamento de montes veciñais con propiedades particulares*

Modifícase o parágrafo primeiro da alínea I do artigo 54 da Lei 7/2012, do 28 de xuño, de montes de Galicia, que queda redactado como segue:

“I. A comunidade propietaria presentará á Administración forestal, logo do acordo da súa asemblea xeral, unha proposta coa liña de deslindamento, fundamentada histórica e legalmente, entre o monte veciñal e as propiedades privadas particulares, que se pretende adoptar. O servizo competente en materia de montes da correspondente xefatura territorial emitirá un informe técnico relativo a esta proposta nun prazo máximo de seis meses.”

Artigo 50.- *Condicións que deben cumprir as repoboacións forestais*

Modifícase o artigo 67 da Lei 7/2012, do 28 de xuño, de montes de Galicia, que queda redactado como segue:

“Artigo 67. Condicións que deben cumprir as repoboacións forestais

1. Quedan prohibidas as repoboacións forestais en solo urbano, de núcleo rural, no solo urbanizable e no rústico de especial protección agropecuaria, agás os casos expresamente recollidos nesta lei e nos terreos urbanizables aos que, de acordo coa disposición transitoria primeira da Lei 2/2016, do 10 de febreiro, do solo de Galicia, se lles aplique o disposto nesa lei para o solo rústico.

2. Queda prohibida a sementeira ou a plantación, mesmo de pés illados, en todo terreo forestal ou agrícola e nas zonas de influencia forestal definidas na Lei 3/2007, do

9 de abril, de prevención e defensa contra os incendios forestais de Galicia, con exemplares do xénero *Acacia* e calquera outro sen aproveitamento comercial relevante que se determine mediante orde da consellaría competente en materia de montes.

3. As repoboacións ou as sementeiras nos cultivos enerxéticos en terreo forestal regularanse por orde da consellaría competente en materia de montes.

4. Quedan prohibidas as reforestacións e as novas plantacións intercaladas co xénero *Eucalyptus* naquelas superficies poboadas por especies do anexo I, mesmo con posterioridade ao seu aproveitamento ou á súa afectación por un incendio forestal. Esta prohibición non será aplicable nos casos de rexeneración posterior á plantación ou rexeneración, en piso inferior ou sotobosque, de especies do anexo I.

5. As novas plantacións que se realicen co xénero *Eucalyptus* superiores ás 5 hectáreas precisarán de autorización da Administración forestal. Non será aplicable ás masas preexistentes de *Eucalyptus* nos supostos de reforestación ou rexeneración desa superficie, ou que estean incluídas na planificación dun instrumento de ordenación ou de xestión forestal aprobado pola administración.

6. Nos ámbitos territoriais nos que non existan plans de ordenación de recursos forestais aprobados, poderán regularse mediante decreto a xestión, as reforestacións e as novas plantacións de especies forestais non incluídas nos modelos silvícolas previstos no artigo 76.3 desta lei e aprobados por orde da consellería competente en materia de montes.

7. En todo caso, as repoboacións forestais estarán suxeitas aos supostos previstos no Real decreto lexislativo 1/2008, do 11 de xaneiro, sobre avaliación ambiental de proxectos, e no Decreto 442/1990, do 13 de setembro, de avaliación de impacto ambiental de Galicia.

8. A repoboación forestal en montes catalogados de utilidade pública e nos montes patrimoniais priorizará as especies do anexo I, e terá como obxectivo preferente o protector, ambiental e social, agás que na aplicación de programas de mellora e produción xenética sexa precisa a utilización doutras especies."

Artigo 51.- *Dos instrumentos de ordenación ou de xestión forestal: categorías*

Modifícase a letra d) da alínea 2 do artigo 79 da Lei 7/2012, do 28 de xuño, de montes de Galicia, que queda redactado como segue:

"d) Referentes de boas prácticas e modelos silvícolas ou de xestión forestal orientativos: terán a condición de instrumentos de xestión forestal, para a xestión e o aproveitamento dos montes. Estarán baseados na análise das especies existentes, e nas súas quendas de corta cando as ditas especies sexan arbóreas. Así mesmo, garantirán que non se poña en perigo a persistencia dos ecosistemas e que se manteña a capacidade produtiva dos montes. A súa estrutura, contido, forma de adhesión, comunicación á Administración forestal e consecuencias do seu incumprimento serán desenvolvidos

mediante orde da consellería competente en materia de montes, e non lles serán de aplicación os artigos 80, 81, e 82 desta lei.”

Artigo 52.- *Autorizacións administrativas*

Engádese unha nova disposición adicional quinta á Lei 7/2012, do 28 de xuño, de montes de Galicia, co seguinte contido:

“Disposición adicional quinta. Autorizacións administrativas

As autorizacións outorgadas ao abeiro desta lei entenderanse concedidas, en todo caso, deixando a salvo o dereito de propiedade e sen prexuízo de terceiro.”

Artigo 53.- *Montes con consorcios ou convenios coa administración*

Modifícase a disposición transitoria novena da Lei 7/2012, do 28 de xuño, de montes de Galicia, que queda redactada como segue:

“Disposición transitoria novena. Montes con consorcios ou convenios coa administración.

I. Os consorcios ou convenios de repoboación coa Administración forestal existentes nos montes no momento da entrada en vigor desta lei serán obxecto de:

a) Cancelación de oficio nun prazo que rematará o 31 de decembro de 2021, nos casos seguintes:

- Montes que non presenten saldo debedor na data de entrada en vigor desta lei ou en calquera momento dentro do prazo máximo estipulado.
- Montes catalogados de dominio público que pasen a xestionarse de acordo co establecido no artigo 34 e seguintes desta lei.
- Montes que non consigan os fins para os cales se subscribise o convenio ou o consorcio por causas relacionadas co estado legal, forestal, administrativo ou económico do monte.

b) Finalización nun prazo que rematará o 31 de decembro de 2021, momento en que deberá asinarse un contrato temporal de xestión pública. No caso de non se formalizar o dito contrato no prazo establecido, o titular do monte deberá aboar o saldo debedor do convenio ou consorcio finalizado á Comunidade Autónoma, podendo para isto aboalo nun único pagamento ou a través dun plan de devolución plurianual. No caso de non se producir o aboamento total ou da cota anual disposta no dito plan, procederase á súa anotación preventiva, en concepto de carga real, das cantidades debidas á Comunidade Autónoma de Galicia, no correspondente Rexistro da Propiedade, e non poderán ter axudas

ou beneficios de ningún tipo mentres non regularicen a súa situación nos termos previstos nesta lei.

2. Previamente á cancelación do convenio ou consorcio, a Administración forestal aprobará un instrumento de ordenación ou de xestión forestal, consonte o artigo 81, que garanta a continuidade da xestión forestal sustentable. Exceptúanse do anterior os montes que non consigan os fins para os cales se subscribise o convenio ou o consorcio, cando no momento da entrada en vigor desta lei carecesen de masas arboradas.
3. O novo contrato de xestión pública, se procede dun convenio ou dun consorcio finalizado, considerará, como primeira partida do anticipo reintegrable de novo contrato, a diferenza entre a suma das partidas de gastos sufragados pola Administración forestal e os ingresos do consorcio ou do convenio, aplicando a partir dese momento o réxime previsto para a contabilización.
4. Sen prexuízo do anterior, considerarase liquidado o saldo debedor dos convenios ou consorcios que sexan obxecto de finalización ou de cancelación cando os seus titulares constitúan, ou pasen a formar parte, dunha sociedade de fomento forestal.
5. Para efectos contables, as débedas dos consorcios realizados pola Administración forestal serán condonadas polo importe a que ascendía a dita conta no momento da clasificación do monte como veciñal en man común.
6. As cancelacións referidas no punto 1 desta disposición transitoria publicaranse no Diario Oficial de Galicia e na páxina web da consellaría competente en materia de montes.
7. Nas cancelacións referidas no punto 1 desta disposición transitoria, cando veñan motivadas por non terse conseguido os fins para os cales se subscribiu o convenio ou o consorcio, e sempre que a causa non sexa atribuíble ao seu titular, considerarase que os predios atópanse libres de cargas, liquidándose o saldo debedor do convenio ou consorcio coa Comunidade Autónoma.
8. Entenderanse extinguidos, sen mais trámite, os convenios e consorcios existentes en superficies que contén cun acordo de concentración parcelaria firme. No caso de que na inscrición dos títulos de concentración no Rexistro da Propiedade conste expresamente que os predios atópanse libres de cargas, o saldo debedor do convenio ou consorcio coa Comunidade Autónoma considerarase liquidado."

Artigo 54.- *Revisión de esbozos de montes veciñais en man común*

Modifícase a disposición transitoria décimo terceira da Lei 7/2012, do 28 de xuño, de montes de Galicia, que queda redactada como segue:

"Disposición transitoria décimo terceira. Revisión de esbozos de montes veciñais en man común.

1. Os esbozos de montes veciñais integrados nun expediente que, pola súa antigüidade, non reúnan as características de fiabilidade e precisión que existen as novas técnicas topográficas poderán ser obxecto de revisión total ou parcial, axustándose e completándose con aqueles datos e documentos que se consideren necesarios, en particular os requiridos para a súa inmatriculación no Rexistro da Propiedade.
2. Para estes efectos, o xurado provincial de montes veciñais en man común, de oficio ou por instancia de parte, poderá solicitar á Administración forestal unha proposta coa revisión e elaboración da cartografía actualizada do monte veciñal en man común. Na proposta non poderán incluírse parcelas que figuren inmatriculadas no Rexistro da Propiedade a favor de persoas físicas ou xurídicas distintas á comunidade veciñal de montes.
3. Unha vez aceptada a proposta polo xurado, poñerase en coñecemento da comunidade propietaria e publicarase no Diario Oficial de Galicia para o resto de posibles interesados.
4. Aceptada a revisión, poderase proceder á marcaxe dos montes veciñais, que en todo caso se axustará ao plano que resulte da dita revisión. A marcaxe poderá ser realizada de oficio pola propia Administración forestal ou por instancia das comunidades propietarias.
5. Se durante a revisión ou o marcaxe se suscitan cuestións relativas á propiedade, poñerase fin ao procedemento, dentro do perímetro cuestionado, sen máis trámites. Este acordo de finalización e arquivo parcial do procedemento non será susceptible de impugnación na vía administrativa, sen prexuízo da facultade dos interesados de acudir á vía xurisdiccional civil, por ser esta a competente para dirimir tal controversia."

Artigo 55.- *Aproveitamentos individuais en montes veciñais en man común*

Engádesse unha nova disposición transitoria décimo quinta á Lei 7/2012, do 28 de xuño, de montes de Galicia, co seguinte contido:

"Disposición transitoria décimo quinta. Aproveitamentos individuais en montes veciñais en man común

1. Para os únicos efectos do que establece o artigo 92 desta lei poderanse considerar persoas titulares dos aproveitamentos forestais, por unha soa vez, a aqueles individuos que, antes da entrada en vigor desta lei, plantaran parcelas situadas dentro de montes veciñais en man común de xeito público, pacífico e non interrompido.
2. Para poder levar a cabo este tipo de aproveitamentos individuais en montes veciñais en man común será indispensable que a persoa interesada e a comunidade veciñal de montes formalicen un acordo de cesión dos dereitos de aproveitamento sobre a parcela, que deberá elevarse a escritura pública e na que haberá de figurar necesariamente:

- O acordo favorable ao dito acto da asemblea xeral da comunidade.
- O recoñecemento, por ambas as dúas partes, de que a propiedade dos terreos corresponde á comunidade veciñal de montes.
- O canon ou renda a percibir pola comunidade veciñal de montes. Para o seu cálculo deberán terse en conta todos os anos do prazo total da cesión, desde o inicio da plantación.
- A renuncia, por parte do particular, a calquera dereito individual que puidese ter sobre a parcela unha vez rematado o aproveitamento.

3. En ningún caso poderanse regularizar aproveitamentos individuais en montes veciñais en man común cando as plantacións se levasen a cabo despois da entrada en vigor desta Lei.”

SECCIÓN II *Estrutura agraria*

Artigo 56.- Avaliación do cumprimento dos obxectivos xerais

Un.- Elimínase a alínea 3 do artigo 7 da Lei 4/2015, do 17 de xuño, de mellora da estrutura territorial agraria de Galicia.

Dous.- Modifícasen as alíneas 4, 5 e 6 do artigo 7 da Lei 4/2015, do 17 de xuño, de mellora da estrutura territorial agraria de Galicia, que quedan redactadas como segue:

“4. O servizo provincial elaborará un informe razoado de avaliación que será publicado na sede electrónica da consellería competente en materia de desenvolvemento rural, trala realización dunha consulta a todas as persoas físicas ou xurídicas interesadas que permita coñecer a súa opinión sobre a iniciativa e as propostas de mellora.

5. No caso dunha actuación de reestruturación parcelaria de carácter público, de obterse unha avaliación positiva, a dirección xeral competente en materia de desenvolvemento rural poderá someter a zona ao procedemento de estudo previo de iniciación sinalado no artigo 9.

6. Nas actuacións de reestruturación de predios de vocación agraria polas persoas particulares, de obterse unha avaliación positiva, poderase proceder directamente conforme ao disposto no artigo 48.”

Artigo 57.- *Réxime en precario das fincas da Masa Común*

Engádese un novo artigo 33 bis á Lei 4/2015, do 17 de xuño, de mellora da estrutura territorial agraria de Galicia, co seguinte contido:

“Artigo 33 bis. Réxime en precario das fincas da Masa Común.

1.As fincas da masa común, que xorden coa aprobación do Acordo, serán de titularidade da Xunta de Galicia, e mentres dure o proceso de reestruturación parcelaria permanecerán adscritas á consellería competente en materia de desenvolvemento rural, a cal exercerá sobre as mesmas todas as potestades, incluída a súa adxudicación en propiedade, consecuencia das necesidades da reordenación da propiedade.

2. A consellería competente en materia de desenvolvemento rural, unha vez resoltos os recursos de alzada e cantas outras cuestións se presenten contra o Acordo de reestruturación parcelaria, poderá remitir ao Concello ou Concellos onde radique a zona obxecto do proceso, un listado das fincas da masa común a fin de que este, mediante a oportuna publicidade no taboleiro de anuncios, as poña a disposición dos interesados para solicitar a súa cesión en precario en tanto as citadas fincas non pasen a ser titularidade da entidade xestora do Banco de Terras.

3.O concello remitirá as solicitudes presentadas á dirección xeral competente en materia de desenvolvemento rural, que proporá, á vista do informe do servizo provincial, o outorgamento en precario da finca de que se trate.

O acordo da consellería outorgando a cesión da finca en precario recollerá as condicións e duración da mesma.”

Artigo 58.- *Masa común*

Modifícasen as alíneas 6 e 7 do artigo 34 da Lei 4/2015, do 17 de xuño, de mellora da estrutura territorial agraria de Galicia, que quedan redactadas como segue:

“6. A entidade xestora do Banco de Terras constituirá, cos ingresos obtidos da xestión dos predios sinalados no número 4 e daqueles ingresos procedentes dos predios que xa forman parte do seu patrimonio e que se cualifiquen como aptos para os seus fins, un fondo para cada zona de concentración ou reestruturación parcelaria, con destino a melloras estruturais na zona. A forma de xestión dese fondo desenvolverase regulamentariamente.

7. A titularidade do resto dos bens e dos dereitos que constitúen a masa común e que a entidade xestora do Banco de Terras de Galicia cualifique como non aptos para os seus fins, incluídos aqueles predios que á entrada en vigor desta lei xa constituían a masa común e non se cualifiquen como aptos para os fins da entidade xestora do

Banco de Terras de Galicia, corresponderá ao concello ou concellos en que se levou a cabo a concentración ou reestruturación parcelaria. Os beneficios xerados pola xestión ou alleamento deses predios reverterán en melloras estruturais para cada parroquia afectada pola zona de concentración ou reestruturación parcelaria, proporcionalmente á superficie achegada por cada unha delas.”

Artigo 59.- *Tramitación da documentación*

Modifícase a alínea 3 do artigo 41 da Lei 4/2015, do 17 de xuño, de mellora da estrutura territorial agraria de Galicia, que quedan redactadas como segue:

“3.Firmes as bases só serán tramitadas solicitudes de cambio de titularidade de parcelas de achega ata o momento da aprobación do acordo e cando ese cambio afecte á totalidade das parcelas achegadas por unha persoa titular e a transmisión se faga integramente a outra, coa excepción dos cambios derivados de sentenzas xudiciais firmes, que serán tramitadas en calquera caso. En todo caso, a persoa titular adquirente quedará subrogada na posición da anterior persoa titular, coas limitacións, deberes e obrigas que resulten do proceso.

No caso de falecemento dun titular e cando exista partición da herdanza, procederase á tramitación do cambio de titularidade ata a firmeza do acordo, sempre e cando esta partición afecte a fincas de reemprazo íntegras. En todo caso, a persoa titular adquirente quedará subrogada na posición da anterior titular, coas limitacións, deberes e obrigas que resulten do proceso.”

Artigo 60.- *Distancias de explotacións gandeiras porcinas a cascos urbanos*

Engádesse unha disposición adicional cuarta á Lei 4/2015, do 17 de xuño, de mellora da estrutura territorial agraria de Galicia, co seguinte contido:

“Disposición Adicional cuarta.- Distancias de explotacións gandeiras porcinas a cascos urbanos

“Aos efectos da aplicación das condicións mínimas de ubicación recollidas para as novas explotacións porcinas na normativa básica estatal relativa ás medidas de ordenación sanitaria e zootécnica daquelas, e de acordo co sistema de asentamento poboacional propio de Galicia, entenderase por “casco urbano” os asentamentos de poboación suficiente e efectiva constitutivos de núcleos de poboación formados, na data de solicitude do título habilitante correspondente da nova explotación porcina por, alomenos, 10 edificacións de uso residencial con separación entre elas inferior aos 25 metros, que estean formando rúas, prazas e outras vías urbanas, constituíndo un conxunto no que teñan a súa residencia a lo menos 100 persoas. Non se considerarán, polo tanto, incluídos no concepto de “casco urbano” outro tipo de asentamen-

tos de poboación que non cumpran conxuntamente cos ratios de poboación e edificacións anteriormente sinalados, nin as vivendas illadas dispersas, nin os asentamentos poboacionais en diseminado constitutivos de núcleos rurais.

A distancia sinalada na normativa de referencia, medirase entre a edificación con uso residencial do “casco urbano” mais preta da explotación, e o peche sanitario da mesma.”

Artigo 61.- *Coordinación catastral.*

Engádesse unha disposición transitoria sexta á Lei 4/2015, do 17 de xuño, de mellora da estrutura territorial agraria de Galicia, co seguinte contido:

“Disposición Transitoria Sexta.- Coordinación catastral.

1. Ao abeiro do artigo 9.b) da Lei Hipotecaria, e de acordo coa normativa hipotecaria, procederase á conversión gráfica dos datos alfanuméricos das fincas de reemprazo das zonas que, á entrada en vigor desta lei, o seu Acordo sexa firme ou se teña outorgado a Acta de Reorganización da Propiedade, sempre e cando non se teñan inscrito no Rexistro da Propiedade os títulos das fincas de reemprazo.

2. A resolución de autorización da conversión gráfica, unha vez acordada pola dirección xeral competente por razón da materia, será obxecto de notificación individual así como de publicación mediante aviso inserto no Diario Oficial de Galicia, na Web da Consellería e no diario de maior tirada da provincia así como nos lugares de costume. A dita resolución poderá ser recorrida consonte co disposto na Lei 39/2015, do 1 de outubro, de Procedemento Administrativo Común das Administracións Públicas.

3. Terase dereito a compensación, no caso de que como consecuencia da antedita conversión, a atribución das persoas interesadas quede por debaixo do valor reducido correspondente a cada persoa titular, para o que se empregarán as fincas da Masa Común da zona que sexan necesarias, aínda que sexan titularidade da entidade xestora do Banco de Terras.

4. As actuacións a que se refiren os números anteriores, deberán levarse a cabo dentro do prazo dos cinco anos seguintes á entrada en vigor desta lei.”

CAPÍTULO VII *Innovación*

Artigo 62.- *Contratación pública de Innovación.*

Modifícase o artigo 28 da Lei 14/2013, do 26 de decembro, de racionalización do sector público autonómico, que queda redactado como segue:

“Artigo 28.- Contratación pública de Innovación.

1. Co obxecto de promover a mellora dos servizos públicos mediante a incorporación de bens e servizos innovadores así como o fomento da innovación empresarial, os poderes adxudicadores da Administración xeral da Comunidade Autónoma de Galicia e do seu sector público incentivarán, na medida en que sexa posible, a presentación de solucións innovadoras nas licitacións que promovan.

Para tal efecto, ponderarán na elaboración dos pregos e na demais documentación contractual a utilización de criterios de adxudicación e de prescricións técnicas que favorezan a presentación de solucións innovadoras.

2. Antes de iniciar un procedemento de contratación pública de innovación os poderes adxudicadores da administración xeral da CCAA de Galicia e do sector público deberán realizar consultas do mercado con vistas a preparar a contratación e informar os operadores económicos acerca dos seus plans e os seus requisitos de contratación.

Para iso, os poderes adxudicadores poderán, por exemplo, solicitar ou aceptar o asesoramento de expertos ou autoridades independentes ou de participantes no mercado, que poderá utilizarse na planificación e o desenvolvemento do procedemento de contratación, sempre que devandito asesoramento non teña por efecto falsear a competencia e non dea lugar a vulneracións dos principios de non discriminación e transparencia.

En concreto, cando un candidato ou licitador, ou unha empresa vinculada a un candidato ou a un licitador, asesorase ao poder adjudicador no contexto destas consultas previas do mercado os citados poderes adxudicadores tomarán medidas adecuadas para garantir que a participación destes posibles candidatos ou licitadores non falsee a competencia, entre as que incluírán a comunicación aos demais candidatos e licitadores da información pertinente intercambiada no marco da participación do candidato ou licitador na preparación do procedemento de contratación, ou como resultado dela, e o establecemento de prazos adecuados para a recepción das ofertas.

O candidato ou o licitador en cuestión só será excluído do procedemento cando non haxa outro medio de garantir o cumprimento do principio de igualdade de trato. Antes de proceder á devandita exclusión, darase aos candidatos ou licitadores a oportunidade de demostrar que a súa participación na preparación do procedemento de contratación non pode falsear a competencia.

3. Os órganos ou entidades competentes en materia de innovación no sector público autonómico colaborarán coas unidades de contratación do sector público na procura de solucións innovadoras, ben a través dos procedementos de contratación previstos

na lexislación de contratos do sector público, ben a través da contratación precomercial, prevista no artigo 4.1.r) do texto refundido da Lei de contratos do sector público, aprobado polo Real decreto lexislativo 3/2011, do 14 de novembro.

necesidade de un produto, servizo u obra innovadores que non pode ser satisfeita mediante a adquisición de produtos, servizos u obras xa disponibles no mercado

4. De acordo co disposto na Directiva 2014/24/UE do Parlamento europeo e do Consello do 26 de febreiro de 2014 sobre contratación pública e pola que se deroga a Directiva 2004/18/CE, os poderes adxudicadores da Administración xeral da Comunidade Autónoma de Galicia e do seu sector público poderán establecer unha asociación para a innovación con un ou varios adxudicatarios que terá como finalidade o desenvolvemento de produtos, servizos ou obras innovadores e a compra ulterior das subministracións, servizos ou obras resultantes, sempre que correspondan aos niveis de rendemento e aos custos máximos acordados entre os poderes adxudicadores e os participantes.

A tales efectos, e sen prexuízo do que se dispoña na lexislación básica de contratos do sector público de transposición da regulación comunitaria, a asociación para a innovación se articulará a través de contratos mixtos de servizos de investigación e desenvolvemento e contratos de subministracións, servizos ou obras resultantes da investigación, de acordo co disposto no Real Decreto Lexislativo 3/2011, de 14 de novembro, polo que se aproba o Texto refundido da Lei de Contratos do Sector Público, e adxudicados mediante o procedemento de diálogo competitivo.

Os contratos de servizos de investigación e desenvolvemento estruturarase en fases sucesivas seguindo a secuencia das etapas do proceso de investigación e innovación e se fixarán uns obxectivos intermedios que deberán alcanzar o/os adxudicatario/os e proverá o pago da retribución en prazos adecuados.

Sobre a base deses obxectivos, os poderes adxudicadores poderán decidir, ao final de cada fase, resolver o contrato, ou no caso dun contrato con varios socios, reducir o número de socios mediante a resolución dos contratos individuais, sempre que o poder adxudicador indicase nos pregos da contratación que pode facer uso destas posibilidades e as condicións en que pode facelo."

Artigo 63.- *Aportación de fondos privados ao desenvolvemento de proxectos de I+D no ámbito do sistema público de Galicia*

Un. No ámbito sanitario galego promoverase a participación das empresas, entidades e particulares na investigación en saúde a través da realización por estes de aportacións económicas, que serán tratadas como finalistas, dirixidas á financiación de proxectos de I+D polo sistema Público de Saúde de Galicia, que permitan a súa valorización e transferencia de resultados.

Dous. A estes efectos, a Consellería de Sanidade e o Servizo Galego de Saúde impulsarán a colaboración con empresas, fundacións e particulares na realización de proxectos integrados no Programa de Valorización de Resultados da Investigación Sanitaria. A elección destes proxectos corresponderá exclusivamente aos órganos da administración sanitaria e non orixinarán retornos económicos aos colaboradores privados.

Tres. A participación das empresas e particulares se realizará a través dun convenio de colaboración específico que se formalizará coa Axencia Galega para a Xestión do Coñecemento en Saúde no que se concretará o importe da aportación e o programa ao que se destinará.

CAPÍTULO VIII *Mar*

SECCIÓN PRIMEIRA.- *MATERIA DE PORTOS*

Artigo 64- *Ampliación do prazo das concesións portuarias outorgadas pola Comunidade Autónoma de Galicia con anterioridade á entrada en vigor da Lei 18/2014, do 15 de outubro, de aprobación de medidas urxentes para o crecemento, a competitividade e a eficiencia.*

Engádesse unha nova disposición transitoria sexta Lei 5/1994, do 29 de novembro, de creación do ente público de Portos de Galicia, co seguinte contido:

“Disposición Transitoria Sexta: Ampliación do prazo das concesións portuarias outorgadas pola Comunidade Autónoma de Galicia con anterioridade á entrada en vigor da Lei 18/2014, do 15 de outubro, de aprobación de medidas urxentes para o crecemento, a competitividade e a eficiencia.

1. O prazo inicial das concesións outorgadas pola Comunidade Autónoma de Galicia con anterioridade á entrada en vigor da Lei 18/2014, do 15 de outubro, de aprobación de medidas urxentes para o crecemento, a competitividade e a eficiencia poderán ser ampliado a petición do concesionario pola administración portuaria competente tendo en conta o disposto no artigo 49 da Lei 22/1988, de 22 de xullo, de Costas e demais normativa de aplicación sempre que o concesionario se comprometa, polo menos, á realización de investimentos relevantes para o porto ou o sistema portuario galego.

2. O investimento mínimo a efectuar polo concesionario será, do cinco por cento (5%) do valor das instalacións obxecto de concesión. Enténdese éste como o correspondente a inicialmente previsto na concesión (orçamento de execución material).

Para a súa consideración como obras computables como “inversións relevantes”, deberán reunir algún dos seguintes requisitos:

- a) Non deben estar previstas no título concesional orixinal.
- b) Aqueles investimentos realizados polo concesionario que non estivesen contempladas no título concesional e que non fosen computadas para os efectos de prórrogas previamente adoptadas.
- c) Investimentos novos a executar dende o ampliación do prazo da concesión.

Asimesmo as obras a realizar deberán mellorar algún dos seguintes aspectos:

- a) Produtividade
- b) Eficiencia enerxética
- c) Calidade ambiental
- d) Operacións portuarias
- e) Introducción de novas tecnoloxías
- f) Novos procesos que incrementen la competitividade.

g) Responsabilidade Social Corporativa e mellora social e da poboación.

As obras a realizar haberán de ser aprobadas expresamente por Portos de Galicia, en base a normativa vixente de aplicación segundo as características da obra proposta.

3. A ampliación ou proroga do prazo da concesión non poderá ser superior á metade do prazo máximo de vixencia establecido na lexislación estatal para as concesións sobre dominio público portuario nos portos de interese xeral.

A ampliación da concesión determinará a modificación das condicións da mesma, incluíndose os novos compromisos adquiridos e o momento da súa execución, que deberán ser aceptadas polo concesionario con anterioridade á resolución sobre a súa outorgamento.

As obras deberán executarse integramente no prazo equivalente a metade do prazo de ampliación ou nos primeiros catro anos seguintes ao comezo da ampliación concedida ao concesionario. Corresponde aos servizos técnicos de Portos de Galicia verificar o cumprimento desta obrigaición para o que deberá estenderse, a solicitude do concesionario, a correspondente Acta de recoñecemento final das obras que xustificasen a ampliación.

O incumprimento da obrigaición de executar as obras e investimentos no prazo establecido así como a execución parcial ou defectuosa dará lugar á caducidade do título de ampliación da concesión e de modificación da concesión no seu caso.

4. Os concesionarios interesados en exercer a opción de proroga ou ampliación do prazo concesión de acordo co establecido nesta disposición poderán facelo no prazo de dous (2) anos dende a entrada en vigor da presente disposición transitoria no Diario Oficial de Galicia (DOG).

Para a ampliación do prazo, o concesionario deberá presentar unha solicitude á que haberá de acompañar:

- a) Identificación da concesión á que se refire a solicitude.
- b) Memoria na que se explique detalladamente os compromisos que asume o concesionario se se lle outorga a ampliación do prazo así coma a xustificación dá mesma.
- c) Proposta dos investimentos realizados ou para realizar, cunha memoria descriptiva e os prazos previstos para a súa execución, no seu caso.
- d) Memoria económico financeira de viabilidade da concesión ampliada de acordo cos compromisos para cumprir.
- e) Declaración responsable de que vos compromisos de investimento executaranse nos prazos fixados.

Analizada a documentación presentada, os servizos técnicos de Portos de Galicia, procederán a verificar o cumprimento dos requisitos e obrigas sinaladas. No caso de que non estivese completa a documentación ou fóra insuficiente, requirirase ao concesionario para que o emende no prazo de quince días.

Completada a documentación, a Dirección de Portos de Galicia emitirá o seu informe sobre a solicitude para a súa elevación ao órgano competente para acordar o procedente sobre o outorgamento da ampliación do prazo da concesión.

A resolución de concesión e a fixación do prazo deberá motivarse tendo en conta:

- a) O tempo restante de vixencia da concesión.
- b) O volume de investimento realizado durante a vixencia da concesión e autorizado por Portos de Galicia, no seu caso.
- c) O volume de investimento novo comprometido.
- d) A vida útil do investimento tanto realizado coma novo.
- e) A memoria económico-financeira da concesión no momento do seu outorgamento e no momento da solicitude de ampliación de prazo.

Asemade para as concesión de portos deportivos e de instalacións en zonas portuarias de uso náutico deportivo destinadas á prestación de servizo ás embarcacións deportivas e de lecer a fixación do prazo da ampliación motivarase conforme aos criterios anteriores, en función da inversión incluída no proxecto de investimento que sirva de base para a ampliación da concesión do prazo, considerando o presuposto incluído IVE., será segundo o cadro seguinte e a coherencia do citado investimento co exposto nos apartados anteriores:

INVERSION	ANOS
Menos 50.000 €	5
50.001 - 100.000 €	10
100.001 - 200.000 €	15
200.001 - 400.000 €	20
Máis de 400.001 €	25

O outorgamento da ampliación ten carácter discrecional, sen prexuízo da obrigaón de motivar as razóns da denegación, no seu caso.

A resolución de outorgamento da ampliación de prazo da concesión será publicada no Diario Oficial de Galicia, facendo constar a lo menos a información relativa ó obxecto, prazo e titular da concesión.

5. A ampliación do prazo concesional non será tido en conta para os efectos da valoración do rescate ou da revisión da concesión, ou da indemnización por calquera causa a concesionarios e non alterará a situación xurídica existente respecto das obras e instalacións executadas polo concesionario que, á entrada en vigor do Real Decreto-Lei 8/2014, do 4 de xullo, de medidas urxentes para o crecemento, a competitividade e a eficiencia, revertesen á Autoridade Portuaria, así como da taxa de ocupación que corresponda esixir polo seu uso. Respecto das obras e instalacións que non revertesen, será de aplicación o réxime previsto legalmente.

6. Os concesionarios que con anterioridade á entrada en vigor da presente disposición presentasen unha solicitude de ampliación e se atopen en tramitación, poderán optar no prazo dun ano a contar desde a entrada en vigor da presente disposición, entre a continuación do procedemento con arranxo á lexislación anterior, ou a me-

llora voluntaria da solicitude para os efectos de adaptala á nova regulación, conservándose os actos e trámites cuxo contido non se vise alterado pola nova regulación.

SECCIÓN SEGUNDA.- Pesca

Artigo 65.- Duración das concesións

Un.- Modifícase o artigo 53 da Lei 11/2008, de 3 de decembro, de pesca de Galicia, que queda redactado como segue:

“As concesións outorgaranse por un período máximo de dez anos, prorrogables por períodos de dez de se demostrar a rendibilidade e o bo uso da explotación, ata un máximo de cincuenta anos, por pedimento da persoa concesionaria e cunha antelación mínima de tres meses ao vencemento da concesión.”

Dous.- Modifícase o artigo 61 da Lei 11/2008, de 3 de decembro, de pesca de Galicia, que queda redactado como segue:

“As concesións outorgaranse por un período de dez anos, prorrogables por períodos de dez, ata un máximo de cincuenta anos, por pedimento da persoa concesionaria.”

Artigo 66.- Concesións experimentais

Un.- Modifícase o primeiro parágrafo do artigo 56 da Lei 11/2008, de 3 de decembro, de pesca de Galicia, que queda redactado como segue:

“Con carácter experimental, e nunca por un período superior aos cinco anos, poderase outorgar unha concesión experimental na zona marítimo-terrestre para a realización de proxectos de investigación ou de proxectos que introduzan innovacións substanciais na explotación, nos artefactos e nas especies, nas condicións que regulamentariamente se establezan .”

Dous.- Modifícase o primeiro parágrafo do artigo 65 da Lei 11/2008, de 3 de decembro, de pesca de Galicia, que queda redactado como segue:

“Con carácter experimental, e nunca por un período superior aos cinco anos, poderase outorgar unha concesión experimental na zona marítima para a realización de proxectos de investigación ou de proxectos que introduzan innovacións substanciais na explotación, nos artefactos e nas especies, nas condicións que regulamentariamente se establezan.”

Artigo 67.- *Prórroga extraordinaria dos títulos habilitantes para o exercicio da acuicultura*

Engádesse unha disposición adicional décimo cuarta na Lei 11/2008, de 3 de decembro, de pesca de Galicia, co seguinte contido:

“Disposición adicional décimo cuarta.- Prórroga extraordinaria dos títulos habilitantes para o exercicio da acuicultura

1. Os titulares de establecementos de acuicultura que ocupen dominio público marítimo-terrestre poderán solicitar, sempre e cando o título fora outorgado antes da entrada en vigor da Lei 2/2013 de 29 de maio de protección e uso sostible do litoral, perante o órgano competente en materia de acuicultura, a prórroga extraordinaria do título habilitante antes de que finalice a vixencia da última prórroga outorgada.

A solicitude da prórroga extraordinaria do título habilitante para o exercicio da acuicultura presentarase cunha antelación máxima de seis meses ao vencemento do prazo de vixencia do permiso de actividade.

Excepcionalmente, por causas debidamente xustificadas, e sempre que non fora expresamente extinguido o título que habilita o exercicio da actividade, o titular do establecemento poderá presentar a solicitude fora dos prazos establecidos nos parágrafos anteriores.

2. A duración da prórroga extraordinaria será a mesma e abranguirá o mesmo período que a outorgada polo órgano competente estatal en materia de ocupación demanial, e en ningún caso poderá exceder de 50 anos.

O prazo máximo establecido no presente artigo poderá ampliarse nunha quinta parte nos supostos establecidos no artigo 175 do Regulamento Xeral de Costas e sempre e cando o órgano competente en materia de ocupación demanial outorgase previamente devandita ampliación.

3. A solicitude da prórroga extraordinaria dos títulos habilitantes incursos nun procedemento de extinción non suspenderán os efectos deste, sendo en todo caso a resolución de extinción causa suficiente de denegación da solicitude da prórroga extraordinaria do título habilitante.

4. O establecido na presente Disposición Adicional non será de aplicación aos títulos habilitantes de actividade da acuicultura en zonas de servizo dos portos nin aos titulares de permisos de actividade experimental.”

CAPÍTULO IX *Servizos sociais*

Artigo 68.- *Réxime de cofinanciamento nos servizos prestados polo Consorcio Galego de Servizos de Igualdade e Benestar ou ente que o substitúa en colaboración cos concellos e mancomunidades*

Un. O sistema de cofinanciamento dos servizos que se presten nas escolas infantís e centros de día xestionados polo Consorcio Galego de Servizos de Igualdade e Benestar ou entidade que se subrogaue nos seus dereitos e obrigas establecidos nos instrumentos de colaboración cos concellos e mancomunidades con fundamento nas competencias que sobre esta materia teñen atribuídas pola normativa vixente as entidades locais, rexerase polo disposto nos apartados seguintes deste artigo, coa finalidade de garantir a sostenibilidade financeira dos servizos que se prestan a través do Consorcio Galego de Servizos de Igualdade e Benestar en colaboración cos concellos e mancomunidades, e homoxeneizar as súas condicións en garantía da seguridade xurídica. Todo en consonancia co acordo marco asinado pola Consellería de Política Social coa Federación Galega de Municipios e Provincias.

Dous. As cantidades que corresponda aboar ás entidades locais derivadas do réxime de cofinanciamento previsto neste artigo terán a consideración de débedas firmes, líquidas e esixibles, e poderán ser obxecto de compensación coa participación destes no Fondo de Cooperación Local, de acordo co disposto na súa regulación.

Cando o obrigado ao pagamento fose unha mancomunidad de municipios os concellos integrantes serán responsables solidarios, na parte que corresponda segundo a súa porcentaxe de participación na correspondente mancomunidad, das débedas xeradas ao Consorcio ou ente que o substitúa polo non pagamento das débedas.

Tres. Para establecer a participación dos Concellos e mancomunidades no cofinanciamento das Escolas Infantís e centros de día estarase ao disposto no Anexo I desta Lei, cuxas condicións serán aplicables con efectos de 1 de xaneiro de 2017.

Catro. O Consorcio ou ente que o substitúa expedirá semestralmente as liquidacións derivadas do réxime de cofinanciamento correspondentes ás entidades locais nas que se indique o número de usuarios e as cantidades aplicables de acordo co establecidos no Anexo I desta Lei. As entidades locais deberán aboalas no prazo de 3 meses. Nos casos de discrepancia na contía, se non se acada acordo na comisión de seguimento establecida nos convenios formalizados no seu día, o Consorcio ou ente que o substitúa ditará resolución motivada fixando a contía, sen prexuízo de que a entidade local poida recorrer na vía xurisdiccional contencioso-administrativa.

Cinco. O réxime de cofinanciamento previsto nesta disposición e no Anexo I será aplicable aos convenios xa subscritos polas entidades locais e o Consorcio Galego de Servizos de Igualdade e do Benestar e asimesmo, será aplicable ás entidades locais que non tiverán convenio asinado pero que o Consorcio teña asumido ou asuma a xestión dos centros ubicados no territorio dos ditos concellos. En ambos os casos será aplicable unha vez que transcorra o prazo de tres meses desde a entrada en vigor desta norma, salvo que dentro dese prazo as entidades locais remitan o acordo adoptado polo órgano competente da entidade local no que se opte polo mantemento do réxime xurídico e de cofinanciamento que se derive do convenio no seu día formalizado. Neste último caso, o consorcio procederá a esixencia polas vías legais procedentes das cantidades íntegras pendentes de pagamento segundo o réxime que se derive do correspondente convenio, sen prexuízo do seu dereito a resolver o convenio por incumprimento.

Seis. As entidades locais que se acollan ao réxime de cofinanciamento establecido no presente artigo para a xestión das Escolas Infantís e centros de día a través do Consorcio Galego de Servizos de Igualdade e Benestar ou ente que o substitúa, poderán acollerse a unha nova liquidación das cantidades pendentes de pagamento, de acordo cos novos criterios económicos fixados nesta Lei, aplicados con carácter retroactivo aos anos anteriores.

Sete. Aos anteriores efectos, o Consorcio ou ente que o substitúa revisará no prazo dun ano dende a aprobación desta Lei todas as liquidacións correspondentes aos anos anteriores practicadas e que foron remitidas aos concellos.

Oito. Ás entidades locais que opten por esta fórmula, unha vez aprobadas as novas liquidacións, se lles aplicará unha bonificación equivalente á metade da cantidade resultante. Co pagamento da citada cantidade daranse por cumpridas as obrigas pendentes co Consorcio.

Establecerase un prazo de fraccionamento para o pago desas novas liquidacións de 5 anos, a solicitude do concello, que podería ampliarse naqueles supostos excepcionais en que a situación económica do concello o requira por estar inmerso nun plan de axuste. En todo caso, a aqueles Concellos que xa aboaron total ou parcialmente as liquidacións de anos anteriores se lle compensarán nas liquidacións futuras os saldos que resultaran de aplicación de acordo con esas revisións.

Artigo 69.- *Historia social única electrónica*

Modifícase o artigo 16 da Lei 13/2008, do 3 de decembro, de servizos sociais de Galicia, que queda redactado como segue:

“Artigo 16.- Continuidade dos niveis de actuación social.

1. A relación entre servizos sociais comunitarios e servizos sociais especializados responderá a criterios de complementariedade, de acción coordinada para a consecución de obxectivos comúns ou de actuación conxunta, coa finalidade de conseguir a continuidade e complementariedade das intervencións que deban aplicarse desde os distintos niveis de actuación.

2. Existirá un único expediente social básico no ámbito dos servizos sociais comunitarios, no que quedarán recollidas todas as intervencións e os servizos prestados á persoa usuaria nos diferentes niveis de actuación do sistema galego de servizos sociais.

3. Para os efectos do establecido na alínea anterior, os servizos sociais especializados incorporarán protocolos de retorno da información aos servizos sociais comunitarios que aseguren a actualización da información no expediente social básico.

4. Regulamentariamente, estableceranse os procedementos de recollida e tratamento de información das persoas usuarias do sistema, garantindo, en todo caso, a confidencialidade dos datos de carácter persoal.

5. A Xunta de Galicia creará a historia social única electrónica como conxunto de información e documentos en formato electrónico nos que se conteñen os datos, as valoracións e as informacións relevantes sobre a situación e a evolución da atención social das persoas usuarias do Sistema Galego de Servizos Sociais ao longo do seu proceso de intervención, así como a identificación dos ou das profesionais e dos servizos ou prestacións que interviron sobre este. A historia social única electrónica deberá así conter a suficiente, axeitada, pertinente e necesaria información para documentar o proceso de intervención social da persoa usuaria. Respecto dos datos de carácter persoal e en cumprimento do principio de calidade, soamente se recollerán na historia social única electrónica aqueles axeitados, pertinentes, non excesivos e necesarios para documentar o dito proceso de intervención social.

Para dar cumprimento ao indicado no parágrafo anterior, as distintas entidades que integran o Sistema Galego de Servizos Sociais, dentro das que se inclúen, ademais das Administracións Públicas galegas, as entidades privadas recollidas no número 2 do artigo 29 da presente lei, deberán incorporar á historia social única electrónica a información e os documentos que a conforman, nos termos que regulamentariamente se establezan, autorizándose ao efecto, en virtude desta lei, a recollida, o tratamento e a cesión dos datos de carácter persoal necesarios para documentar o proceso de intervención social, coa finalidade dunha xestión máis eficaz e sostible do Sistema Galego de Servizos Sociais e da consecución da continuidade e complementariedade das intervencións entre os distintos niveis de actuación.

Xunto ao anterior, e co fin de garantir a globalidade e continuidade da intervención social, autorízase a cesión dos datos de carácter persoal que, conforme ao disposto anteriormente, deban formar parte da historia social única electrónica, por parte dos órganos, entidades e organismos con competencias sobre outros sistemas de protección, no marco estrito e aos efectos unicamente da tramitación dos procesos de intervención social. A estes efectos, os órganos, entidades e organismos responsables dos ficheiros de orixe dos datos incluídos na historia social única electrónica serán responsables da corrección e calidade deles, sen prexuízo das responsabilidades do cesionario.

Autorízase o acceso á historia social única electrónica no ámbito da intervención profesional no Sistema Galego de Servizos Sociais, tanto polos e polas profesionais de atención como polo persoal de xestión e servizos, así como para a acción inspectora de carácter público. En todo caso, o acceso limitarase ao contido necesario, axeitado e pertinente, en atención ás concretas funcións encomendadas.

Así mesmo, de acordo co reparto de competencias en materia de protección social, autorízase o acceso e emprego daquela información contida na historia social única electrónica que sexa necesaria e proporcionada aos fins das actuacións dos correspondentes procesos de intervención social e dunha adecuada atención integral por parte dos órganos, entidades ou organismos competentes noutros sistemas de protección distintos do Sistema Galego de Servizos Sociais.

As incorporacións á historia social única electrónica de información procedente de sistemas de protección distintos do Sistema Galego de Servizos Sociais, así como o acceso á información incluída na historia social única electrónica por parte dos órganos, entidades e organismos competentes en tales sistemas de protección, de acordo co establecido nos parágrafos anteriores, realizaranse con pleno respecto á normativa de protección de datos e conforme ao previsto nos protocolos normalizados que se aproben polo Consello da Xunta de Galicia e que se formalicen entre os órganos, organismos e entidades implicados. Nos ditos protocolos concretaranse os datos obxecto de cesión, no marco dos programas de intervención social, atendendo aos principios de calidade dos datos, necesidade e proporcionalidade, para os distintos ámbitos de información que conforman a historia social única electrónica.

6. A historia social única electrónica terá carácter público e confidencial, e respectará os dereitos das persoas usuarias ao acceso ao seu expediente persoal e a obter copia del, garantindo que esta historia será empregada para a intervención profesional e para a acción inspectora de carácter público nos termos previstos nesta lei. Calquera outro acceso á información contida na historia social única electrónica realizarase nos termos e cos requisitos esixidos pola normativa reguladora de protección de datos de carácter persoal e na demais normativa que resulte de aplicación.

Non obstante o indicado no parágrafo anterior, o dereito de acceso da persoa usuaria á historia social única electrónica non poderá exercerse en prexuízo do dereito de terceiras persoas á confidencialidade dos datos que consten nela recollidos en

interese da intervención da persoa usuaria, nin en prexuízo do dereito dos e das profesionais participantes na intervención, os cales poderán opoñer ao dereito de acceso a reserva da súas anotacións subxectivas."

